

'Itsikate

'Ixaheritsixi hutarieka kememite'itsutia meyuk-witiweti

('Its 1:11-15 - Kuts 15:15-19)

¹ 'Ixaheritsixi Yawé mekaniuta'iwawiya, Kut-suhexi 'ukumawereku reutiyetana:

—¿Kemi'aneta hiki panuyeyerini miwatakwiniki Kananeutsixi?

² Yawé mipai kaniutayini:

—Kura manuyehaitiani kanayeimiki, nekaniye-tuirieniri 'iki kwie naime.

³ Hiki Kura xiïyarimama mipai mekateniwarutahiawe yu'iwama, Tsimihuni xiïyarimama: «Hikimitika teyunaiti kwie temiyetuiriyarietsie, Kananeutsixi tepiwaretakwini, 'ariketa tame xehamatia tepuhu kwie xemiyetuiriyarietsie». Hiki Tsimiyuni xiïyarimama mekaniwareweiya.

⁴ Kepauka Kura kananeutsixi meta peretseutsixi miwarutakwi, Yawé kaniparewieni. Tamamata miriyari mekaniwarukwini Wetseki mirakutewatsie.

⁵ Mana mekaniuyukaxeiya 'Aruni-Wetseki matia, miki mekaniwarutakwini, mekaniwara'iwa kananeutsixi meta peretseutsixi.

⁶ 'Aruni-Wetseki kaniuyuta'unakaitini peru mekanenukuweiya mehenuku'axeka, mekanenuwitekiriexiani 'itiwameya 'amipapa meta ketateyatsiememe.

⁷ Hiki 'Aruni-Wetseki mipai kaniutayini: «Haika tewiyari heimana tamamata te'aitamete

yu'itiwame 'amipapa mewatiwitekiyarietikaiti
meta yuketatetsie, nemexatia miranakaxiriwe
mekatenekukwa'akaitini. Kaka'yari yaxeikia hiki
pinetsi'uyuri». 'Ana Kerutsareme mekaneihana,
manari kanemini.

⁸ Kura xiiyarimamatsiere Kerutsaremetari
mekaniwarutakwini, 'ixiparaki yunaime
mekaniwarukwini, meta naime kiekari
mekaniutataiya.

⁹ 'Ariketa Kura xiiyarimama mekanekine
hiritsie kananeutsixi mewatakwinike, Nekexi
mirakutewatsie meta Tsepera.

¹⁰ Kananeutsixi Hewuruni kiekatari wahetsia
paiti mekaniye'axiani, Kiriati-'Ariwa mititewakai
meripaiti, te'aitamete Tsetsahi, 'Akimani, meta
Tarimahi mekaniwarukwini.

¹¹ Mana memiyeki Rewixi kiekariyaritsie
meye'axiaka mekaniwarutakwini, meripaiti
Kiriati-Tsepexi mititewakai.

¹² Hiki Karewi mipai kaniutayini: «Kemi'ane
Kiriati-Tsepexi mitamieni maye'ani, ne neniwe
nekaniwitiitiamiki 'Akatsa».

¹³ 'Utunieri katiniuyurieni Kenatsi nu'aya,
Karewi taruya, hiki Kare yuniwe kaniwitiitiani
'Akatsa.

¹⁴ Kepauka miki hetsiana munua, 'Utunieri
kanitawawirieni yupapa kwie mitawawirieniki.
'Akatsa 'anakayaku puxutsie Karewi
kanita'iwawiya:

—¿Kekuta pe'ane?

¹⁵ Miki mipai kaniutayini:

—Waikawa kwerieti nepimatsiwawirie.
Kwie pemnetsi'umi Nekexi mieme, haixateta
keneneuxatia nepiini mayaniki.

Mipai Karewi yuniwe katiniyetuirieni haixate, hiritse muxuawekai meta muweritsie.

¹⁶ 'Uwaxi nuiwarimama Keni tewiyari, Mui sexi munieya, Kura xiiyarimama mekaniwareweiya, Makutakiya memiyeki 'atsita makumawetsie Kura kwieyaritsie, Nekexi mukuma 'Arari kwieyari 'aurie. Mana mekaniuyuhayewa mana kiekatari wahamatia.

¹⁷ 'Ariketa Kura xiiyarimama mekaniwareweiya yu'iwama, Tsimihuni xiiyarimama, mekaniwarutakwini kananeutsixi Tsepati kiekatari, mekanika'una naime kiekari. 'Arike Tsepati, Kuxima katiniuteriwarieni.

¹⁸ Kura xiiyarimamata Kahatsa kiekariyaritsie mekanitahaxiani meta 'Atsikaruni 'Ekuruni, miki yuxexuiti yukwie meheuxeiyati mekanakine mewara'iwaka.

¹⁹ Kura xiiyarimama wahamatia Yawé kaniuyeikaitini. Miki hiri yaritetsie mekaniukuyaxixiani mewara'iwaka, peru muweritsie kiekatari mepikawarukemakaxia, tepia kaxetayari memiwareuxeiyakaiki.

²⁰ Mui sexi kemutayikai, Karewi Hewuruni tipinieya kanayani, mana kiekaritsie yuhaikame 'Anaki niwemama kaniwarayeweiya.

²¹ Wenikamini xiiyarimamata kewutseutsixi mewarayeweiyake mepika'uyiwekaxia, Kerutsareme memititekai. 'Ayumieme hiki 'akuxi kewutseutsixi Wenikamini xiiyarimama wahamatia mekaniu'uwani.

²² Kutse xiiyarimamata Weteri mekaniye'axiani, Yawé kaniwaparewiekaitini.

²³ Nenieremete meri Weteri mekaniwareni'ani, kiekari meripaiti 'Arimetira makuma mirakutewakai,

²⁴ xewiti kiekame 'ayeyaku miki mipai mekaten-itahiawe: «Ketatineutaxatia ketemitehaxiani kiekaritsie, 'eki 'ana 'aixia tepimatexeiyani».

²⁵ Miki tewi kaniwaruxeitsitiani kememiteheutahaxianikekai, hiki mikita mekaniwarukwini 'ixiparaki, peru miki tewi tiiriyamama yunaime mepikawarukwi.

²⁶ Miki tewi kaneyani hetitsixi wakwietsie, mana yukiekari kaniukamani katiniteriwa 'Arimetira, hiki 'akuxi mipai katinakutewaka.

²⁷ Manatsexi xiiyarimama mepikawarukemakaxia Wetsehani kiekatari meta Tanaki kiekari 'auriena mamametika, meta Ruxi kiekari-yaritsie, 'Iwurehami meta Mekiru kiekatari mepikawarukemakaxia meta kiekarite 'auriena mamametika kananeutsixi, memikayuwairiyakaiki memanuku'uni.

²⁸ Kepauka 'ixaheritsixi metirikawiti memaki mepuyiwekaxia wairiyarika mepitewaruta'uximayatsitia kananeutsixi, tsepa hatsuaku memika'uyiwekaxia memiwarayeweiya yunaime.

²⁹ 'Epirahini xiiyarimama tsiere mepika'uyiwekaxia memiwarayeweiya Ketsehexi kiekatari, mipai kananeutsixi watsata mekatenuyuhayewa.

³⁰ Tsawuruni xiiyarimama yaxeikia mepika'uyiwekaxia memiwarayeweiya kananeutsixi, Kituruni kiekatari meta Naruri kiekatari, miki wahamatia mekaniuyuhayewa mete'aitiarieti wairiyarika.

31 'Atsexi xiiyarimamatatsiere
mepika'uyiwekaxia memiwarayeweyaki 'Akuhu
kiekatari, Tsiruni, 'Akirawi, 'Akitsiwi, Keriwa,
'Apeki meta Xekuwi.

32 Memika'uyiwekaxiakiri 'Atsexi xiiyarimama
kananeutsixi watsata mekaniuyuhayewa miki
kwieyaritsie memu'uwakai.

33 Nepitahari xiiyarimamatatsiere
mepika'uyiwekaxia memiwarayeweyi Weti-
Tsemetsi kiekatari meta Weti-'Anati, mipai
kananeutsixi wahamatia mekaniuyuhayewa
miki kwieyaritsie. Tsikeretsi wairiyarika
mekateniwaruta'aitiani teiteri Weti-Tsemetsi
meta Weti-'Anati kiekatari.

34 'Amuxeutsixi Rani xiiyarimama
wairiyarika mekaniwarupitiani muhriyatsie
memiyuhayewaniki, mukuweritsie
memiwakakineki mepikawapitiakai.

35 'Amuxeutsixi mepiyuwairiyakai Heretsi
hriyaritsie memititeniki, meta 'Ayaruni,
Tsariwini. Peru kepauka Kutse xiiyarimama
meyumiireti memaki, 'amuxeutsixi mekateni-
uta'aitiarieni wairiyarika memite'uximayakaki.

36 'Amuxeutsixi wakwie kaniye'atikateitini
tsutiti, Terikaxi mematihe mirakutewatsie
'ukuhaneti Tsera paiti ye'atikaiti matsi'akuxi
heimana paiti.

2

Niuki tuayame Yawé hetsiemieme Wukini

1 Niuki tuayame Yawé hetsia mieme Kirikari
kaniyeyani kaneta'ani Wukini paiti, mana
mipai katiniwaretahiawe 'ixaheritsixi: «Ne

'Ekipitu kwieyaritsie nepixe'ayewiti, nepixe'atia kwie xetutsima nemiwayetuirienikekatsie. Mipai neputayi: "Hatsuaku nepikatihayewa kenemixe'utahiawixi,

² xemeta tiratu xepikawewieka miki teiteri wahamatia, matsi pita hakewa mawarika memeyet-uaya miki xepika'una". Peru yaxepikatekaki. ¿Titayari miyaxete'uyi?

³ 'Ayumieme hiki mipai xeketenemaika kename nekawarayeweiya miki teiteri, xemanu'uwanitsie miki waikawa mepixe'uximatiaka, meta wakakaiyarixi mepitexe'iriwiyani».

⁴ Kepauka niuki tuayame Yawé hetsia mieme mipai mitiwarutahiawixi yunaime 'ixaheritsixi, miki teiteri mekaniutitsuani karima.

⁵ 'Ayumieme mana Wukini mekateniuteriwa, mana mawarika mekaniuwewieni Yawé hetsiemieme.

Ke'axamemite'uyuri kememite'a'iwarie

('Its 2:6-9 - Kuts 24:29-31)

⁶ Kepauka Kutsuhexi miwarutateutia teiteri, 'ixaheritsixi kwiepa mekaneutayeixiani, yukwie mekunaxianike yuxexuiti.

⁷ Teiteri Yawé mekanayexeiyakaitini 'akuxi kepaimexia memu'uwakai wahamatia, Kutsuhexi meta memiparewiekai te'aitamete, Yawé mariweme naimeki kemitiyurienekai memitexeiyakaiki 'ixaheritsixi wahetsiemieme.

⁸ Kutsuhexi, Nuni nu'aya, Yawé ti'uximayatsiriwame, kaniumini xeitsienituyari heimana tamamata wiyari hexeiyati,

⁹ kaniukateukieni mirakutewatsie Timinati-Keretsi, kwie miyetuiriyarietsie, 'Epirahini

kwieyaritsie muh̄iriyatsie, Kahatsi h̄iriyari manuka yeta.

¹⁰ Meta miki 'ana mana mem̄u'uwakai yunaiti mekaniukwini, hipati pita mekaniuneni Yawé mem̄ikamaikai meta 'atsimem̄ikatemaikai kem̄itiuyuriekai 'ixaheritsixi wahetsiemieme.

¹¹ Miki 'ixaheritsixi Yawé kem̄ikatinake mekateniuyurieni, kakaiyarixi mekaniwarayex-eiyakaitini Wahari hetsia miemete.

¹² Yawé mekaniuku'eirieni yu'ukiyarima wakakaiyari, 'Ekipitu miwarayewiti, hipame kakaiyarixi pita mewarayexeiyati mekanakine, mana kiekatari wakakaiyarixi nenewieri mep̄iwapitiakai, Yawé mipai mekateniuye-haxiatiani.

¹³ Yawé me'uku'eirieka, kakaiyarixi mekani-warayexeiyakaitini Wahari hetsia miemete meta 'Atsitaruti 'ikiyarite.

¹⁴ Hiki Yawé kaniuyeha'ani 'ixaheritsixi wahēki, kaniwarupitiani mem̄iwaraye'unie wapii-nite mem̄itewanawatsiriet̄weniki. Niwayetuani waneikixiwima wahetsia wa'aurie mem̄utet̄ikatei meripaiti mem̄ikawara'iwaxi.

¹⁵ Kepauka 'ixaheritsixi mem̄ayek̄ikakai meyutakwinike, Yawé pikawaparewiekairi miki ke'axamemite'uyuriekai, Yawé meripaiti kem̄itiwarahiawekai. Mipai 'ayumieme waikawa mekateniuka'eniwakaitini.

¹⁶ Hiki Yawé 'itsikate kaniwarunetiani, miki mekaniwaruxina mem̄itenawatsiyariet̄wekaiki.

¹⁷ Yaxeikiatsiere 'ixaheritsixi miki mep̄ikawaru'eni, 'axamekateniuyurieni pita kakaiyarixi mewarayexeiyati wahixie me'ukatunuma'uweti. Yapauka huye

mekaniuku'eirieni watutsima memiweiyakai,
huye 'aixia mi'ane Yawé kemiti'aita huyeyari.

18 Kepauka Yawé miki 'itsikate
miwaranuka'uitiwakai. Mexi kamiweni 'itsikame
ti'aitati kaniwaparewiekaitini memiwaraye'unie
wahepaitsita, Yawé kaniwanenimayakaitini
wa'enieti miki memutitsuanakaiki 'aixia
mekatexeyarieti memite'uka'eniwakaiki.

19 Peru kepauka miki mitiwa'aitia
mumini, miki tawarita matsi 'axam-
eteyurieti mekanakikakaitini watutsima
ke'axamemikate'uyuri, hipame kakaiyarixi
mekaniwarayexeyakaitini wahixie
mekanikatunuma'uwekaitini. Mipai meyiati
mepikayuwairiyakai memitehayewa 'axamiti'ane
memite'uweiyakai meta ke'axamemite'u'iyarikai.

20 'Ayumieme Yawé niuyeha'ani 'ixaheritsixi
waheki mipai kaniutayini: «Metsi 'iki nuiwari
mekapi'enie tiratu kenemituwwewi watutsima wa-
hamatia, mepikanetsiheu'enie,

21 netatsiere nepikawarayeweiya hipati nui-
wari Kutsuhexi mumitsie miwaruku'eiri.

22 Hipame nuiwari nepiwayuitiani 'ixaheritsixi
nemiwata'iniataki mipai nemiretimaniki xika'aku
nehuye me'uweiyani, yututsima wahapai».

23 'Ayumieme Yawé piwaruhayewaxi miki
nuiwarite, pikawaranuyewei Kutsuhexi hetsia
pikawayetua.

3

1 Miki nuiwarite mekanihikitini
Yawé miwaruhayewaxi 'ixaheritsixi
memiwata'iniataki, memikayutakwiwawekai
nihatsuaku Kanani kwieyaritsie.

² Mipai katiniuyurieni para 'ixaheritsixi wanui-warima memikayutakwiwawekai nihatsuaku, memuyuta'iniataki memitehetimaniki.

³ Mekaniuyuhayewa yu'auxiwiti pirtsiteutsixi tewa'aitiwamete, yunaiti Kananeutsixi, yunaiti tsiruniyutsixi meta heweutsixi Riwanu hiriyaritsie memititekai, Wahari-Heximuni hiriyaritsie metsutiti, meye'atikaiti Rewu-Kamati.

⁴ Mana Yawé kaniwarutixirieni 'ixaheritsixi memiwata'iniataki, xika'aku 'iniari niukiyari mehaye'atiaka, miki miwayetuiri Muitsexi tixaxatameyatikaku.

⁵ 'Ixaheritsixi kananeutsixi wahamatia mekaniu'uwakaitini meta hetitsixi, 'amuxeutsixi, peretseutsixi, heweutsixi, meta kewutseutsixi.

⁶ Miki teiteri waniwema mekaniwarutiwitini, manata yuniwema mekaniwaruyewikitiani meta wakakaiyarixima mewarayexeiyati mekanakine.

'Utunieri

⁷ 'Ixaheritsixi Yawé wakakaiyari kemikatinake mekateniuyurieni, kakaiyarixi Wahari hetsia miemete wahixie mekanikatunuma'uwekaitini meta 'Atserá hetsia miemete.

⁸ Yawé waikawa kaniuyeha'ani 'ixaheritsixi waheki, kaniwayetuani ti'aitame Kutsani-Xitsatahini hetsia, Metsuputamiya* miti'aitakai, 'atahaika wi-yari mekateniuta'uximayatsitarieni.

⁹ Peru Yawé me'utitsuati mekaniutahiwiieni meyunenewieti, miki xeime wawikweitsitiwame kaniutinetiani, 'Utunieri Kenatsi nu'aya, Karewi taruya. 'Utunieri 'ixaheritsixi kaniwaruxina.

* **3:8 3:8** *'Arami-Nakarahini tatsiarititi.*

10 Yawé 'iyarieya 'Utunieri hetsie kaninuani, mipai 'ayumieme 'ixaheritsixi wa'itsikame kanayani, kanayeyani Kutsani-Xitsatahini hetamienike 'Arami miti'aitametikai, hiki Yawé 'Utunieri kaniupitiani me'iwaki.

11 'Ana 'ixaheritsixi meka'uximatarieti mekanakine huta tewiyari wiyari, 'Utunieri Kenatsi nu'aya 'ukumawerekuke.

'Ahuni nawaxaya

12 Tawarita 'ixaheritsixi Yawé kemikatinake mekateniuyurieni, 'axakememite'uyuriekaiki 'Ekuruni tirikariya kaniupitiani, Muhawi ti'aitame mitiwata'aitaniki.

13 Me'uyunika 'amunitsixi, 'amarekitsixi, hiki 'Ekuruni kaneyani 'ixaheritsixi kaniwarutakwini, Makutakaya kiekariyari naiti tipiinieya katinayani.

14 'Ixaheritsixi 'Ekuruni katininiwa'uximayatsitakaitini, ti'aitame Muhawi kiekame, tamamata heimana 'atahaika wiyari.

15 'Ixaheritsixi hutarieka Yawé me'utitsuati mekaniutahiwiene, xeime wahetsie nunuwame kaniutakeni, 'Ahuri Kera nu'aya, miki mu'utakai Wenikamini xiyyarieyatiti. 'Ixaheritsixi miki mekaneni'ani memiteyukutuaya me'i'itiaka ti'aitame 'Ekuruni hetsia, Muhawi ti'aitame.

16 'Ahuri kaniuyutawewiriekaitini nawaxa nait-sata heutixikakaunime xeitsikuriyari tewime, yuteuri tserieta 'utia kaniteni yu'ixuriki hetia.

17 'Ekuruni ti'aitame Muhawi kiekame, kaniye-tuirieni tumini, miki waikawa piwaiyakai.

18 Kepauka 'Ahuni mītiyetua, kaniwaru-tateutiani yunaime tumini 'iwemete muwa memayetekai.

19 Peru hutarieka kaninuani tetexi kakaiyarixiyari memati'u yenuaka Kirikari 'aurie, mīpai kaniutayini:

—Ti'aitame, xapa nepahurie 'ahetsiemieme 'awiekameki.

Ti'aitame mīpai kaniutayini:

—Kayuwati xekeneumaka.

Yunaiti hetsiana memite'uximaya mekani-wayekine.

20 Hiki 'Ahuri 'ahurawa kaniuyani ti'aitame hixie, yuxaita kiita kanayekateitini muxikanitsiemiemeta ki'amutewita paratsiyu heima manuti'ekatsie, mīpai katinitahawe:

—Kakaiyari pinetsiheyeni'a nemimatitaxatianiki.

Kepauka ti'aitame manukuke yu'uwenitsie,

21 'Ahuri yunawaxa kaniwatihana yuteuritsie mikakekai ti'aitame hukayatsie kaniutatseni.

22 Nawaxa 'utia mamaya naiti kaneuhani, 'ana kwinuriteya kanawiwieni. 'Ahuri pikaheha yunawaxa miki hukayatsie paiti kaniyuhayewa waiyarieya kaneinakaitini.

23 Kitenie reunaxiaka reutuikaxiaka miki kii 'amutewita, 'Ahuri 'etsimayewatsie kanatsuna.†

24 Kepauka 'Ahuri meyakairi, ti'aitame parewiwamete mekaniu'axiani, metehetimaika kename reunatikatei kii 'amutewita mīpai mekaniutiyuani: «Xiari kanekwitaneni kiita 'etsimuyeyewata».

† 3:23 3:23 Teiwariki *la ventana*. Pukwaniwe 'iki wixarikaki mitateriwa.

25 Kwinie meteneutere me'ikwewieti mekaniuti'uxe. Ti'aitame kareuyepiwekaku kiita, yawiki mekateneuyepieni. Muwa mekanitaxeiya kwiepa 'ukaime mikime ti'aitame.

26 Mexi me'ikwewiekai 'Ahuri kaniuyuta'una. Tetexi kakaiyarixiyari memati'u kaniuyeyani Tsehirati kaneyani.

27 Kepauka mana munua 'awa kaniutahitsieni 'Epirahini hiriyaritsie, 'ixaheritsixi memuyukuxeirieniki, hamatiana mekanekine, 'Ahuri'anuyehaitiati.

28 Mipai katiniwarutahiawe: «Kimitika, Yawé kanixeyetuirieni muhawitsixi». Hiki hamatiana mekaneki Kurutani mayekunitsie manuyeyikitsie mekaniuyuhayewa, Muhawitsixi mana memakikani mepikawapitiakai.

29 'Ana mekaniwarukwini tamamata miriyari muhawitsixi, tsepa memitirikawikai memeuyutakwiwawekai. Nixewiti pika'utawikwei.

30 Miki tukaritsie 'ixaheritsixi muhawitsixi mekaniwara'iwa, mana mitiyehane kayuwati mekanexeyakaitini nauka tewiyari wiyari.

Tsamikaxi

31 Hutarieka Tsamikaxi manuyeka kanayani 'Anati nu'aya, miki 'ataxewi tsienituyari kaniwarukwini piritsiteutsixi xeime kiyeki tuurutsixi wa'ariwameki. Mikitatsiere kaniwaruxina 'ixaheritsixi.

4

Rewura 'uka

1 'Arike 'Ahuri 'umiku, 'ixaheritsixi 'axamekate-niuyurieni, Yawé kemikatinake.

² Hiki Yawé kaniwayetuani Kawini hetsia, Kanani kwieyaritsie ti'aitame hetsia, Katsuxi 'ukaiti piti'aitakai. Kuyaximama wa'ukiyari kanihikitikaitini Tsitsara, Karutseti-Kuhimi mukatei.

³ 'Ixaheritsixi Yawé mekaniutahiwiwieni me'utitsuati Yawini tepia kaxetayari 'atanauka tsienituyari miwarexeiyakaiki, xeitewiyari wiyari waikawa 'ixaheritsixi mekaniwa'uximatiakaitini.

⁴ Miki tukaritsie katiniwa'aitiakaitini 'ixaheritsixi tixaxatame 'ukatiti Rewura titewati, Rapiroti kani'iyayatikaitini.

⁵ Rewura Takiya hetia putayeixakai mana pititixanetiariwakai, Xama mirakutewatsie meta Weteri wahixiapa, 'Epirahini muhiriyaitsie, mana mekaneta'axekaitini 'ixaheritsixi 'aixia meteyurienike tita memite'ayuyexeirietikatei.

⁶ Rewura Waraki katiniutani'airieni, 'Awinuhani nu'aya, Tseretsi mukatei Nepitahari kwieyaritsie, mipai katinitahiawe:

—Yawé, 'ixaheritsixi takakaiyari mipai pimatia: “Kenemie Tawuxi hiriyaritsie mana keniwarekuxeiri tamamata miriyari teiteri, Nepitahari xiyyarimama meta Tsawuruni xiyyarimama.

⁷ Ne Tsitsara nepita'inieni Kawini kuyaximama wa'ukiyari, yumireme meta kaxetate mewaruhati, 'akitsie Kitsuni paiti. Mana nekaniwayet-uamiki xemiwara'iwaki”.

⁸ Waraki mipai katinitahiawe:

—Xikatsi 'eki penetsi'anuweiyamiki nekanimieni, yapitikatixai nekatimie.

⁹ Rewura mipai kaniutayini:

—'Aixia kani'aneni nekamenanuweiyamiki, peru wairiyarika pemiyaneki, 'eki 'aixia petikuxaxatsiwati pepika'ayani, Yawé Tsitsara kaniyetuamiki 'ukaratsitime hetsia pita.

Rewura kaneyani Waraki hamatia Tseretsi paiti,

¹⁰ mana kaniwaruta'inieni Tsawuruni nuiwarimama meta Nepitahari nuiwarimama. Tamamata miriyari 'ukitsi mekaniuyuwairiya kemitiwarahiawekai, meta Rewura kaneiweiya.

¹¹ Hewexi Keni tewiyari yuxaita kananayeyakaitini hipame kenitsixi wahamatia, Huwawi memixiyyarieyatikai Muitsexi munieya, Tseretsi 'aurie Tsanahini kaninuani, xiu manuwe kaniuyutaxamarutiani.

¹² Kepauka Tsitsara mitiutaxatiarie kename Waraki 'Awinuhani niweya Tawuxi hiriyaitsie heutimiekai,

¹³ Tsitsara kaniwaruta'inieni 'atanauka tsienituyari tepia kaxetayari, meta yunaime yukuyaxima, Karutseti-Kuhimi 'aki manuyekatsie Kitsuni paiti.

¹⁴ Hiki Rewura Waraki mipai katiniutahiawe.

—Kenewatikari, 'iki tukaritsie Yawé Tsitsara 'ahetsia kaniyetuamiki. Kaniyuritini Yawé 'akuyaxima wahixie kaniumiemi.

Waraki kananakayani Tawuxi hiriyaitsie, tamamata miriyari teiteri warawititi.

¹⁵ Waraki kemitiyemiekai yumieneti, Yawé kaniparewiekaitini, kaxetate kaniutimure kuyaxi mekana'iwariekaitini, hiki Tsitsara kananakat-suna yukaxetatsie kaniyuta'una kaniutanautsa.

¹⁶ Waraki kaxetatetsie mekaniwaranukuweiya meta kuyaximama Karutseti-Kuhimi paiti. Yunaity Tsitsara kuyaximama mekaniukwi'iwa, nixewiti 'ayeniereti pika'uyuhayewaxi.

¹⁷ Tsitsara kaniuyuta'unakaitini yu'ikama Kaheri xamaruya manuwekai paiti, Hewexi Keni tewiyari 'iyaya. Miki 'aixia mekateniyux-eiyakaitini ti'aitame Kawini Katsuxi miti'aitakai, Hewexi Keni tewiyari xiiyarimama wahamatia.

¹⁸ Kaheri kanayeyani Tsitsara heunakimieka, mipai katinitahiawe:

—Xeiya ti'aitame, muwa keneutahaki. Pepikamaka.

Tsitsara xamaruta kaneutahani, miki 'ukaratsi mata 'ixurikiyariki kanenukanani.

¹⁹ Miki mipai kaniutayini:

—Ne nepeuharimiki, ha'etsiwa peminetsi'umini katiyiwe.

'Ukaratsi retsi kananutiyepieni nawita miyema kani'itiani, hutarieka kanenukanani.

²⁰ Miki mipai kaniutayini:

—Kitenie keneuweni, xika xewiti muwa hamieni xika ha'iwawani: “¿Kemi'ane muwa payeka?”, hawaiki pepaineni.

²¹ Kepauka mukutsukai Tsitsara 'uxiyaki, Kaheri Hewexi 'iyaya kiye manuyemitsi xamarut-siemieme 'akwetit meta titsuname kayuwati hep-ana kaniuyani. Hiki mu'uyatsie kaneitsuna kiye kananuyeneni kwiepapaiti kaneukeni. Mipai Tsitsara katiniumini.

²² Waraki mana kaniuyeyani Tsitsara 'uweiyati, Kaheri 'ixeyaka hepana kaniutanautsa. Mipai katinitahiawe: «Neuxei kenaye'a, nematsixeitsitiani

tewi pemuweiya». Waraki hamatiana kaneutahani xamaruta, muwa kaniukateitini Tsitsara mikiti kiye haketu yumu'utsie.

²³ Mipai Kakaiyari, ti'aitame Kawini Kanani kiekame tixati pikarayeitia 'ixaheritsixi wahixie.

²⁴ 'Ixaheritsixi matsi waikawa
mekanitikariyariekaitini Kawini
memimietiwekaitsie, miya me'iyurieti
mekanika'una.

5

Rewura kwikarieya

¹ Miki tukaritsie Rewura meta Waraki 'Awinuhani nu'aya mipai mekatenukwika:

² «Kepauka te'aitamete 'ixaheritsixi memite'aita,
kepauka teiteri yikimana memiyuwairiya,
Yawé 'aixia ke'itarieka.

³ »Xekeneu'enana, te'aitamete. Xekene'enanaka
xemite'aita.
Ne nepitakwika, Yawé nepitaniawa,
nepitikayuitiani Yawé hetsiemieme, 'ixaherit-
sixi wakakaiyari.

⁴ »Yawé, kepauka Tsehixi hetsie pemiyyetia,
kepauka 'Erumi kwieyaritsie pemuyemiekai,
kwie putayua,
muyuawitsie mepiwatayua,
haiwitiri haa putayauri.

⁵ Hirite putiyyiakaxi
Yawé mexeiyyati, Kakaiyari Tsinahi kiekame,
Yawé mexeiyyati, 'ixaheritsixi wakakaiyari.

- 6 »Kepauka Tsamikaxi muyeikakaitsie 'Anati
nu'aya,
kepauka Kaheri muyeikakaitsie,
kikamete huye mekaniuku'eirieni
'axamitiu'anetsie mekaneukuyune.
- 7 Memeuyutakwiwawekai 'Ixaheri hetsia
miemete mekaniukumaware,
mepumawekai, kepaukake ne nemanukuke,
Ne, Rewura, nepanukuke
'ixaheritsixi wamaama hepai.
- 8 Kepauka kakaiyarixi hipame
memiwaranayexei,
kuyaxa ninuani kiekari kitenie,
huta tewiyari miriyari (40.000) 'ixaheritsixi
nepiwaruxei
pitsika mepikahexeyakai meta kimana
memiyukunarima tepia.
- 9 'Ixaheritsixi memanuyetei wahamatia ne'iyari
puyeika,
memiyuwairiya wahamatia.
Yawé 'aixia ke'itiarieka.
- 10 »Xeme puxuri memeutuxatsie xemanutiyaxike
'ixuriki xe'anayewerati xemayaxike,
xemeta, huyeta xemuhu,
mipai xeketeku'eriwani.
- 11 Kwikari mayuane tewaxi mematiharewetsie,
Yawé heitserie kemitiuyuri pitikuxata,
kuyaximama 'ixaheritsixi ke'aixia
memiteyurie.
Hiki Yawé kuyaximama
mekaniu'axiani kiekari kitenie.

12 »Rewura, kenanutanieri, kenanutanieri.
 Kenanutanieri, kenanutanieri, kwikari
 keneutakwika.
 Kenanukukexi, Waraki 'Awinuhani nu'aya,
 'apiretsutsixi keniwaranuhapani.

13 »Memutawikwei wa'ukiyarima
 te'aitamete wahetsia mekanekine,
 Yawé kuyaximama
 nehetsia mepu'axia kwinimieme
 memiteyiwawe.

14 Hipati 'Epirahini hetsie mekanayenexiani
 meta 'Amareki nuiwarieyatsie,
 Wenikamini xiiyarimama mepiwanikai 'iya
 memixe'uweiyakai.

Makixi memakanexia kuyaxi memanuyetei,
 Tsawuruni memayenexia, 'itsi ti'aitame
 memu'i.

15 Rewura hamatia matiaru te'aitamete
 mepuhukai 'Itsakaxi xiiyarimama.
 'Itsakaxi Waraki hamatia kaniuyeikakaitini,
 miki 'utia kaneyani mayeweritsie paiti.
 Xuweni kuyaximama mariwemeki
 mete'utaxataka
 yamepikatekaki.

16 Matsi pita yukie mekanitiyaxe me'atinaiti
 muxatsi wahiwemete wahiware wawikiari
 meta'enieti.

Xuweni nuiwarimama
 niuki mekanixiatikaitini.

17 Karaha Kurutani manuyeka matsi humapaiti
 kaniukateitini.
 Rani, titayari nawiyatsixi wahamatia
 tiuyuhayewaxi?

'Atsexi, haramara tetsita kaniuyuhayewa,

- haramara meutawetikatsie kaniuyuhayewa.
 18 Tsawuruni teiterimama yutukari mepiyetua
 kepauka memukwi,
 Nepitahari kemuyi
 hiritsie meheyukukwika.
- 19 »Te'aitamete me'u'axiaka mekaniuyutakwini
 haa mayema Mekiru 'aurie,
 Te'aitamete Kanani miemete Tanaki mekani-
 uyutakwini,
 peru pirata mepikaheti meta kakuni kwinier-
 aye'ati mirayepine.
- 20 Muyuawitsie xurawetsixi mekaniuyutakwini,
 memanuyeteitsie paiti me'uyeteti Tsitsara
 mekaniutamieni.
- 21 Haa kwinimieme mititirikaiye Kitsuni kani-
 warehautsitiani,
 haa xeiya muhane meripaimieme, Kitsuni
 kwinimieme mititirikaiye.
 Keneumieni, ne'iyari, 'atirikarima.
- 22 Muratsixi wakeya payuane,
 muwa mepanautsaxi axime, muwa
 mepanautsaxi axime kawayutsixi
 memitirikawi.
- 23 Yawé niuki tuayameya mipai kaniutayini:
 "Merutsi 'axakeneuyuri 'iya.
 'Axakeniwaruyuri teuterimama
 waikawameki,
 Yawé memikahekuparewiki,
 Yawé memika'uparewiki meta hetsiana
 miemete memikawaruparewiki".
- 24 »Kaheri kehikitini, Hewexi Keni tewiyari 'iyaya,
 waikawa 'aixia mi'itiarie,

waikawa 'aixia mi'itiarie xamaruta memeutei.

25 Tsitsara haa 'uta'iwauku, Kaheri retsi
kani'itiani,

'aixia memite'u'iyari wawatsuta retsi kwa-
mariekame kani'itiani.

26 Yu'utaki kiye kaniutikweni,
yu'aixiaki tepia titsuname tiutikwei.

Tsitsara mu'uyatsie kaneitsuna,
kanatana kananeni.

27 'Ikatiāna kaniukaweni,
mana 'ukaweka mana kaniuhuni.

Manuwekai kaniukaweni,
mana kaniukaweni mikiti.

28 »Tsitsara maamaya kii 'etsimayewatsie
kananiere,

waikawa 'iyarixieti mipai katiniuhiwa:

“¿Titayari kaxetaya hawaiki karamie?

¿Titayari kaxetate wayuariya kara'eniiriiki?”

29 'Ukarawetsixi kwinimieme memitemaiwawe
mipai mekaniutiyuani,

mikita yaxeikia kanaineni:

30 “Mekateneyutapitiwani piinite, tita
memitewarenawairi:

yuxexuime yati yuhuhutame 'ukari yuxexuiti
kuyaxi,

'ixuriki witsimi'anene Tsitsara hetsiemieme,
xeime 'ixuriki, yati hutame, witsimi'anene
muxutika nekiipitiamieme.

Naiti 'iki 'iya tiwapiinite”.

31 »Mipai mekete'ukwini yunaiti Yawé,
memimatsi'aye'unie.

Peru kemi'ane mimatsinaki'erie, tau hepai
ke'aneni kepauka maneika xawatiti».

Hiki 'ixaheritsixi kayuwati mekanexeyakaitini huta tewiyari wiyari.

6

Kerehuni

¹ 'Ixaheritsixi 'axamekateniuyurieni Yawé kemikatinake, miki kaniwayetuani mariyanitsixi wahetsia 'atahuta wiyari.

² Kwinimieme mariyanitsixi 'ixaheritsixi mepitewananaimakai, 'ayumieme mekaniyuti'awieta hiritsie terita naitsarie hakewa memikawaretaxeiyakekai.

³ Kepauka 'ixaheritsixi memuka'etsakai, mekani'axekaitini mariyanitsixi, 'amarekitsixi, meta hipati tau manatineika kiekatari mekaniwarutakukuyakaitini.

⁴ Mana me'axeti waxata mekanita-hakekaitini, naitsarie wakwietsie Kahatsa paiti mekaniye'axekaitini. Nitixaiti mepikatekuhayekawakai 'Ixaheri kwieyaritsie rayeniereme: muxatsi, tuurutsixi, meta puxuri.

⁵ Mekani'axekaitini yutewama metewaru'arieti, meta 'ixuriki kiyari mete'utiti 'ut-sikari wahepai mekateniyuxexeyakaitini. Teiteri meta kameyutsixi yunaiti mepikayu'iniatsiniakai miki kwieyaritsie mekanitahakekaitini metehakuxitianike.

⁶ Kwinimieme nitixaitiri mepikatehexeyakai 'ixaheritsixi mariyanitsixi miyameteyuriekaku, Yawé mekaniutahiawe me'utitsuati.

⁷ Mariyanitsixi miyamewayuriekaku kepauka 'ixaheritsixi Yawé memutahiawixi,

8 Yawé xeime Kakaiyari niukameya kaniwareyeni'airieni, mipai kaniutayini: «Mipai kanaineni Yawé, 'ixaheritsixi wakakaiyari: “Ne nepixe'ayewiti 'Ekipitu kwieyaritsie, hakewa xemitehe'uximayakai,

9 kememitexe'aitiakai nepixe'uxinaxi. Yaxeikiatsiere nepixe'uxinaxi 'iya memixe'aye'uniekai wahetsia, xehixie nepiwarayewei wakwie nemixeyetuirieniki”.

10 Mipaita nekatnix'e'utahiawe: “Ne Yawé nekanihikitini xekakaiyari, 'amuxeutsixi wakakaiyarixi xepikawarayexeyani, xekwietsie mem'uwa”. Peru xeme xepikanetsi'anu'eni».

11 Niuki tuayame Yawé hetsia mieme kaninuani, xiu hetia kaniutayerini 'Upira muwekaitia, Kuhatsi kwieyatsie, 'Awietsexi xi'yarieya. Kuhatsi nu'aya Kerehuni tiriku kanikatsenekaitini kaxie matiketsinariwatsie yu'awietati, 'iti'utake mariyanitsixi me'ikuxiniki.

12 Kepauka niuki tuayame Yawé hetsia mieme, Kerehuni hixie muyuhekiataxi mipai katinitahiawe:

—Yawé 'ahamatia kaniuyeikani, tewi pemitirikaiye pemeuyutamiewe.

13 Kerehuni mipai kaniutayini:

—Xika tati'aitiwame, tahamatia 'uyeikani, ¿titayari kuta miyatatiyuriene? ¿Hakewatami tapaapama kememitatekuxaxatiwakai mariwemek kemitiuyuri: “Ekipitu Yawé katanayewitini”? Yawé katanexirieni, kataniyetuan mariyanitsixi wahetsia.

14 Yawé matsi mipai katinitahiawe:

—Kenemie kepem̄it̄it̄irikaiye, 'ixaheritsixi pekaniwataw̄ikweitsit̄iam̄iki mariyanitsixi kemem̄iwayurie. Ne nep̄ih̄iki nem̄imatsihanun̄i'ani.

¹⁵ Kerehuni m̄ipai kaniutaȳini:

—Perutsi neti'ait̄iwame, ǂ'ixaheritsixi kenetiaw̄ikweitsit̄iani? Taxīiyari mikat̄irikaiye p̄ih̄iki Manatsexi hetsiem̄ieme, meta 'iwamarixi ketemitap̄ime ne nem̄ikaxeiyarie nep̄ih̄iki.

¹⁶ Yawé m̄ipai katinitah̄iawe:

—'Eki pep̄iwar̄a'iwa mariyanitsixi xewiti tewi m̄iȳianeni hep̄ai, netsi 'ahamatia nekaniuyek̄am̄iki.

¹⁷ Kerehuni m̄ipai kaniutaȳini:

—Xika 'aix̄ia penetimaika, 'iniari mariweme ketineuyuri kename 'aku 'eki peȳiane nehamatia pem̄it̄ikuxata.

¹⁸ Waikawa nep̄imatsiwawir̄ie pep̄ikaheyeikani nenuayuke, mawarika neti'at̄iayu 'ah̄ix̄ie neti-tip̄iyuke.

Yawé m̄ipai kaniutaȳini:

—Nep̄imatsikwewieni kepaukake pemunuani.

¹⁹ Kerehuni kaneyani muxa nunutsi 'itsariyari mekawewieniki, yap̄aimemeki 'arinaki paa mikakuxanariyariet̄ika kaniutiwewieni. Hiki wai tsikīiwit̄itsie kanikayatsa, xaritata hayari, katinep̄ini niuki tuayame katiniuxat̄iani xiu het̄ia.

²⁰ Niuki tuayame Kakāiyari hets̄iam̄ieme m̄ipai kaniutaȳini:

—Wai kenanatitu'i meta paa mikakuxanariyarie, 'iki tetetsie ketinap̄ini manata hayari keneutiyeuri.

Kerehuni m̄ipai katiniuyur̄ieni.

21 Hiki yu'itsi makwekaiki, niuki tuayame Yawé hetsiamieme wai kaniutseni meta paa mikakuxanariyarie, hiki tetetsie tai kananeni naime kaniutitaiya wai meta paa, hiki niuki tuayame hixiena kaniukumawere.

22 Kepauka Kerehuni mipai miretima, mipai kaniutayini:

—Xiari ne nepimini, niuki tuayame Yawé hetsiamieme nepuxei nehixiki.

23 Peru Yawé mipai katinitahiawe:

—Kayuwati mana keneuyeikani, pepikamaka. Pepikamini.

24 Hiki mana Kerehuni mawari taiyame kaniutawewieni Yawé hetsiamieme, mipai katiniteriwa «Yawé kayuwati mitiyupitiwa», hiki miki 'akuxi kaneyuhekiaka 'Upira 'Awietsexi kwieyaritsie.

25 Miki tikaritsie Yawé mipai katinitahiawe: «Xeime tuuru kenanayehani 'apaapa tewamamatsie, hutariekamieme 'atahuta wiyari hexeiame. Mawari taiyame keneuta'una 'apaapa mitawewi Wahari hetsiamieme, meta kiye mana muwe kakaiyari mana mukuka, 'Atserá 'auriena muwe kenawiteki.

26 Hiki, hiri heima memuguayuti'awiwietatsie, mawari taiyame keneutawewi Yawé hetsiamieme 'akakaiyari. Kiye 'Atserá mana muwekai kiyexiyari pemitiwiteki, keneutataiya miki hetsie hutarieka mieme tuuru mawarika taiyariyari hepai».

27 Kerehuni yakatiniuyurieni Yawé kemirehiawekai tamamata warawititi hetsiana memite'uximayakai. Hekita kayuwairiyati

yiwikake yakatiniuyurieni, yu'iwama wamakati meta teiteri kiekaritsie memititekai.

28 Kepauka kiekaritsie kiekatari ximeri memanuku'ui, mekanixeiya mawari taiyame Wahari hetsia mieme kani'unikaitini, kiye 'amuwekai kakaiyari 'Atserá manukukatei nawitekiekaitini, mana hutarieka mieme tuuru kanita'ikaitini miratimawatire hekwameki wewiyakametsie.

29 Mipai yunaiti mekateniyukihawekaitini: «¿Kemi'ane 'iki miya pitiuyuri?» 'Arike 'anikai me'uti'iwauka, mipai mekatenetimani: «Kerehuni Kuhatsi nu'aya katiniuyurieni».

30 Hiki teiteri kiekaritsie kiekatari, Kuhatsi mipai mekateniutahawe:

—'Aniwe kenewayehani, pimini, mawari taiyame Wahari hetsiamieme muta'unaxiki meta 'Atserá 'ikiyari mutataraxiki.

31 Peru Kuhatsi mipai katiniwarutahawe memitate'akai:

—¿Xeme Wahari hetsie xetenua? ¿Xete'itawikweitsitianikuta, mipai xeteku'eriwa? Kemi'ane Wahari miwikweitsitiamiki, ke'umini kakatariwekaku. Xika Wahari 'aku kakaiyaritini, miyikihiani piyiwenikeyu kemi'ane mita'una mawari taiyame piinieya.

32 'Ayumieme miki tukaritsie Kerehuni «Yeruware» mekateniuteriwa, mipai me'utiyuati: «Wahari keyukihiani 'iya hetsiamieme», miki mita'unaxiki.

33 Yunaiti mariyanitsixi meta 'amarekitsixi meta hipati teiteri tau manatineika kiekatari, mekaniuyunini Kurutani hatuxameyaritsie

mekanakine, Ketsireri mayeweritsie mekani-tiyaxe.

³⁴ Hiki Kerehuni 'Iyariki hineti Yawé hetsiamieme, kuxineta kaniutahitsieni, yunaiti 'Awihetsexi niwemama mekaniuta'inierieni memenuweiyaki.

³⁵ Niukamete kaniwareni'ani Manatsexi xiiyarimama wahetsia, memiwareta'inieniki memenukuweiyaki, yaxeikiata katineni'ani 'Atsexi xiiyarimama, Tsawuruni, Nepitahari xiiyarimama wahetsia memininiki, mikita mekaniparewieni.

³⁶ Kerehuni Kakaiyari mipai katiniutahiawe: «Xika 'ixaheritsixi pewatawikweitsitiamiki ne 'aixia nemitiuka'iyariki, kepeminerahiawekai,

³⁷ neuxei ne muxa huxarieya 'ena nepitiwiwieni kwiepa. Xika haitsi mikitsie xeikia 'ukaxirieni xika 'auriena kwiepa hawakitikani, 'ana mipai nepiretimani kename 'ixaheritsixi pewatawikweitsitiani nekimana, kepeminerahiawekai».

³⁸ Mipai katiniuyini. 'Uxa'arieka ximeri kananukukeni Kerehuni, miki muxa huxarieya kaniutahirumina, xeiwatsuyari haa kanayani.

³⁹ Hiki Kerehuni Kakaiyari mipai katiniutahiawe: «Pepikaha'aka nehamatia. Keneneupitia tawarita nemetitawawirienikayu. Tawarita 'iniori keneuwewi 'iki muxa huxarieyaki. Hikita 'iki muxa huxarieya kewakini, 'aurienata kwiepa kehakuyunani haitsiki».

⁴⁰ Mipai katiniuyurieni Kakaiyari miki tikaritsie. Miki muxa huxarieya kaniwakikaitini, peru 'auriena naiti kwiepa kanakuhaitsiyakaitini.

7

Kerehuni kemitiwara'iwaxi mariyanitsixi

¹ Yeruwahari —tatsiari Kerehuni— meta yunaiti teiteri ximeripaiti me'anuku'uka mekanekine, haixa Karuri mititewa matiniere mekanitiyaxe. Mariyanitsixi memakutekai wayeta katini'anekaitini, mayeweritsie hiri Mure hetia.

² Hiki Yawé Kerehuni, mipai katiniutahiawe: «Yuwaikawame teiteri pepiwarawitiki nemiwayetianikenyu mariyanitsixi xehetsia. Tieti 'ixaheritsixi mipai memiteniu'eri kename yukimana mete'uyuri,

³ mipai ketiniwarutahiawi hiki: “Kemi'ane muyiyiakani marikaki, ke'ukunuani hiri Karaha tematitei yukie keheyani”. 'Ana yu'utima mekanekine xeitewiyari heimana huta miriyari, tamamata miriyari mekaniyuhayewa.

⁴ Peru Yawé Kerehuni mipai katiniutahiawe: «'Akuxi teiteri mekaniyuwaikawani. Hapa keniwarukatetia, mana nepiwaranuyehapani 'ahet-siemieme. Xika mipai nehaineni: “'Iki 'a'utia kanimieni”, miki kanimieni, peru xika mipai nehaineni: “'Iki 'a'utia pikamie”, miki pikamie».

⁵ Kerehuni hapa teiteri kaniwarukatetiani. Mana Yawé mipai katinitahiawe: «Kemi'ane yuneniki memitihareni tsiikiri wahepai keniwarupata, 'iyata metitunuma'uti memitihareni xaitsie».

⁶ Haika tsienituyari teiteri mekanitihareni yu-mamak me'enatihaniwetit yuteta meheitatu'ati. Hipati yunaiti metitunuma'uti mekanitihareni.

⁷ Yawé Kerehuni mipai katiniutahiawe: «Haika tsienituyariki teiteri memutihari yuneniki, ne nepixetawikweitsitiani, mariyanitsixi ne nepimatsiyetuirieni. Hipatita memuyuhayewaxi yukie mekehekine».

⁸ Hiki Kerehuni hipame 'ixaheritsixi kaniwareni'ani yukie, haika tsienituyari xeikia kaniwarukunuitiani, 'ikwaite mekatenukunuaitiani meta 'awate hitsieriwame.

Mariyanitsixi mematitekai mayeweritsie piti'anekai, wayeta paiti Kerehuni mepititekai.

⁹ Miki tikaritsie Yawé Kerehuni mipai katiniutahiawe: «Xekenanuku'uti mematiteitsie xekeneukakini, nekaniwayetuamiki Mariyanitsixi.

¹⁰ Xika peheumaka pemiwatakwiniki, kenaye'axi meri matsiparewiwame, Pura hamatia,

¹¹ mana ketinetamari kemiretaine. 'Anake pepiyiwekaxiani pemiwatakwini mematiteitsie».

Hiki Pura hamatia 'iparewiwameya mekaneukakine tehewemete memati'upaiti, mematitei manuye'atikatsie.

¹² Mariyanitsixi, 'amarekitsixi, meta hipati teiteri tau manatineika hepatsie kiekatari mana mekanititekaitini mayeweritsie, mekaniyumirekaitini 'utsikari wehepai mekateniyuxexeiyakaitini. Wakameyutsixi mepikayu'iniatsiniakai, xiekari haramara tetsita mitika hepai.

¹³ Kerehuni mana kaninuani yemeki xewiti yuheinitsi yuhamiku kuxaxatiwakaku.

Mipai katinikuxatakaitini:

—Mipai nepitiuheini, tsewara payari tematitei mariyanitsixi kaninuani 'uxikiriwarumeti, kepauka 'ixuriki kiyaritsie mukawautsekai miki kanatixiriwekaitini.

¹⁴ Hamikuya mipai katinitahiawe:

—Miki tixaiti piti'iniariyari, 'ixaheri tewiyari 'ixiparaya kanihikitini Kerehuni Kuhatsi nu'aya. Kakaiyari kaniyetuirieni mariyanitsixi meta tinaime 'ena mitikupine.

¹⁵ Kepauka Kerehuni heinitsika mu'eni meta kemitiuhekiatsie, kaniutihiximakeni. Hiki mekanakunuaxiani 'ixaheritsixi mematiteitsie mipai kaniutayini: «Xekenanuku'uti. Yawé mariyanitsixi kanixeyetuirieni».

¹⁶ Kerehuni me'ayehaikame kaniwarayeitiani, xeitsienituyaritsixi meyupapaimeme 'awa kaniwaruta'itiani meta tai mepu'ikai xariki 'anukanatikaimé.

¹⁷ Mipai katiniwarutahiawe:

—Xekenene'ikeni kenemitiyurieneni. Kepauka mematitei temaye'axiaximeni yaxeikia xeketenyurieka kenemitiyurieneni ne.

¹⁸ Kepauka ne meta meminetsi'aweiya 'awate temitihitsieni, xemeta xemeitihitsieni mematitei wawaritatsie, mipai xemetiyuani: “Yawé hetsiemieme meta Kerehuni hetsiemieme”».

¹⁹ Kerehuni meta teiteri xeitsienituyari hamatiana memuhukai, mematitekaitsie manuyeniere mekaniu'axiani tikari hixiapa tehewemete memayutipatatsie, kepauka hutarieka tehewemete memanuta-haxianikekaitsie. 'Awate mekaniutihitsieni meta xarite mekaniutitara kwiepa.

20 Me'ayuyehaikati 'awate mekaniutihitsieni meta xarite mekaniutitara. Tai mekaniuti'ini yu'utaki, yutserieki 'awa me'u'iti memi-tihitsienikekai, mipai mekateniuhiwa: «Yu'ixipara xekenewatihapani, Yawé hetsiemieme meta Kerehuni hetsiemieme».

21 Yuxexuiti 'ixaheritsixi mekana'utikine mematiteitsie, hiki yunaiti mariyanitsixi mekaniutinautsa me'utitsuati.

22 Kepauka haika tsienituyari 'awate mutiyua, Yawé yakatiniuyurieni miki teiteri mana memukutekai yukimana mekaniuyutakwini yu'ixiparaki. Miki mekaniuyuta'una Weti-Tsita paiti, Tserera hepatsie, 'Aweri-Mekura kiekariyari manuye'atika paiti, Tawati kiekariyaritsie heuhurakaku.

23 Hiki 'ixaheritsixi mekaniuta'inierieni, Nepitahari xiiyarimama, 'Atsexi xiiyarimama meta yunaiti Manatsexi xiiyarimama, miki mariyanitsixi mekaniwaranukuweiya.

24 Naitsarie hiritsie 'Epirahini kwieyaritsie Kerehuni texaxatamete kaniwarutani'ani mipai me'utiyuaneme: «Xekeniwaruhupiexia yeuta meta hamuxapa mariyanitsixi, Kurutani hatuxameyaritsie manuyeyikitikatsie xekenanu'uixia, Weti-Wara paiti ye'atikaimetsie mexi miki meka'anukiniwawe».

'Epirahini nuiwarimama yunaiti mipai mekatenikakine kememite'utahiawarie.

25 'Ana 'Urewi mekaniuwia meta Tsewi, yuhutame mariyanitsixi wa'ukiyarima. 'Urewi mekaniumieni 'aitsie hiki miki 'ai 'Urewi mekateniuteriwa, Tsewi mekaniumieni kaxie takari matipinariwatsie hiki mana Tsewi mekate-

niuteriwa. Mepikatehayewakai mewaruweiyati mariyanitsixi, 'Urewi mu'uya meta Tsewi mu'uya Kerehuni mekanetikirieni, Kurutani hatuxameyari 'anutaie muyuhayewakai.

8

Tsewa meta Tsarimuna

¹ 'Epirahini xiayarimama Kerehuni mipai mekatenuataiawe:

—¿Titayari miya petatiyuriene? ¿Titayari pekatatiuta'ini kepauka pemetia mariyanitsixi pewaretakwinike?

Mekanitatienu yu'iyariki.

² Miki mipai kaniutayini:

—¿Kenetiuyuri ne, xemeta kexete'uyuri? ¿'Atsixelakemate xeme matsi waikawa xemite'uyuri keyuri ne? Xeme 'etsiwa kexemite'uyuri, matsi waikawa piraye'axe, keyuri tame waikawa temite'uyuri.

³ Kakaiyari puwayetua xehetsia 'Urewi meta Tsewi, mariyanitsixi tewa'aitiwamete. Xika teheitixeyaxiani xeme kexemite'uyuri, neta kenemitiuyuri tixaiti pikatihiki.

Kerehuni kemutayi me'i'enieka mekatenuhayewa meha'ati hepaitsitana.

⁴ Kerehuni meta teiterimama haika tsienituyari Kurutani hatuxameyaritsie mekananukine tsepameti memi'u'uxekai, peru miyatiti 'akuxi hipame mepiwaruweiyakai memiwaraye'uniekai.

⁵ Mana Kerehuni Tsukuti kiekatari mipai katiniwarutahiawe:

—Paa xekeniwarumikwa nekuyaxima, mepu'u'uxe 'akuxi Tsewa meta Tsarimuna

nepiwaruweiya Mariyani kiekariyaritsie
te'aitamete.

⁶ Tsukuti kiekatari memanuyetei mipai meka-
niutiyuani:

—¿Kamitsiri Tsewa meta Tsarimuna
petiwara'iwaxi? ¿Titayari paa tetewamini
'akuyaxima?

⁷ Kerehuni mipai kaniutayini:

—'Aixia kani'aneni, kepauka Yawé
minetsiyetuirieni Tsewa meta Tsarimuna, xuyaki
ne nenixetihetikamiki xewaiyaritsie meta 'itsi
makumawetsie miemeki.

⁸ Mana miyetia kaneyani Peniheri manata yax-
eikia kaniutayini. Peru Peniheri kiekatari yax-
eikia mekateni'eiya Tsukuti kiekatari wahepai.

⁹ Ayumieme mipai katiniwarutahiawe Peniheri
kikatari: «Kepauka nemakunuani nerane'iwame
'iki tuxiyu nekanatihiamiki».

¹⁰ Tsewa hamatia Tsarimuna, Karikuxi
mekanititekaitini kuyaxi tamamata heimana
'auxiwime miriyari mewarawititi, miki
xeikiari mekanihikitikaitini tau manatineika
hepatsie kiekatari, mekaniukwi'iwakaitiniri
meyukwitiweti xeitsienituyari heimana
xeitewiyari miriyari kuyaxi.

¹¹ Kerehuni ku'uwamete mematiteitsie
kaneutiyune, Nuwa tserieta meta Yukiweya,
mana kaniwarutakwini kepauka kuyaxi
'atsimemikateha'eriwakai.

¹² Te'aitamete memuyuhuta Mariyani
kikatari, Tsewa meta Tsarimuna mekani-
uyuta'una, peru miki kaniwaranukuweiya
kaniwarutiwiya, wamariutati yunaima kuyaxi.

13 Kepauka Kerehuni Kuhatsi nu'aya makunua heyukumieka, Keretsi kaniuyeyani,

14 mana xeime kaniuwiya temaiki kaniti'iwawiya. Hiki temaiki kaniwaraka'utiani haika tewiyari heimana tamamata memanuyetei 'ukirawetsixi Tsukuti kiekatari.

15 Hiki Kerehuni kaneyani mipai katiniwarutahiawe Tsukuti kiekatari: «Kamí 'ena Tsewa meta Tsarimuna mikiki xeminiukixiekai mipai xe'utiyuati: “¿Kamitsi petiwara'iwxiri Tsewa meta Tsarimuna? ¿Titayari paa tetewamini 'akuyaxima memu'u'uxe?”»

16 Miki kaniwarutiwiya 'ukirawetsixi te'aitamete mana kiekatari, xuya kanikuwauni meta 'itsi makumawetsie mieme, mikiki katiniwarukwinitiani Tsukuti kiekatari.

17 Peniheri tuxiyuyari meta kaniuka'una meta teiteri kaniwarukwini mana kiekatari.

18 Hiki kaniwaruta'iwawiya Tsewa meta Tsarimuna:

—¿Keme'anenekai teiteri xemiwarukwi Tawuxi?

Miki mipai mekaniutiyuani:

—'Ahepai mepiteyuxexeiyakai, hutarieka te'aitamete wahepai mepiteyuxexeiyakai.

19 Kerehuni mipai kaniutayini:

—Ne'iwama mekanihikitikaitini, nemaama niwemama, Yawé kemirayeniere xika xetewareuyehiwirienike, ne nepikaxekwinikeyu.

20 Yuniwe Ketexi hepa 'uyaka 'amiyumate mipai katinitahiawe:

—Xeiya keniwarukuya.

Peru Ketexi yu'ixipara pikahewatiha mitemaikitikaiki pimakai.

21 Tsewa hamatĩa Tsarimuna mipai mekaniutiyuani:

—Xeiya, 'ekiti ketaneukuya. “Uki kanimatsiikini kemitiyiwe”.

Kerehuni kananukukeni Tsewa meta Tsarimuna kaniwarukwini meta wakameyutsixi kuka memaititĩkatei metseri hepai 'aneneme kaniwaratixiniriexiani.

Mawari wewiwame kamixaya 'etsiminena

22 Hiki 'ixaheritsixi Kerehuni mipai mekateniutahiawe:

—Ketatineuta'aitia tame, 'a'utiata 'aniwe, miki 'utiata 'ateukari, pemitatsi'uxinaxiki mariyanitsixi wahetsia.

23 Peru Kerehuni mipai katiniwarutahiawe:

—Ne nepikatixeta'aitiani, meta neniwe. Yawé xeikia pitixeta'aitiani.

24 Mipaita kaniutayini:

—Mipai nepitixetahiawe, yuxexuiti xeme xekenetsiyetuirieni hanira, meripai temiwarutakwi tiwapiini.

'Itsimaheritsixi huru hanirayari yamekateneu-manakaitini.

25 Miki mipai mekaniutiyuani:

—Tekameniyetuiriekuni.

Mana mata 'ixurikiyari mekanikuwera, yux-exuiti mana yuhanira mekanamaxiani.

26 Naiti kanayani tamamata heimana 'atanauka kiruyari huru hanirayari, ka'iniariti mirakatiriketika, mitixikirawi, 'ixurikite mixeta te'aitamete wakamixa Mariyani kiekatari, meta kuka kameyutsixi memekatitĩkatei.

27 Miki huruki Kerehuni mawari wewiwamete memenakatiki kaniutawewieni, yukiekaritsie 'Upira mirakutewatsie kanihiani. Yunaiti 'ixaheritsixi 'axamekateniuyurieni miki hixie metitunuma'uweti, Kerehuni meta niwemama wawiniyari kanayani.

Kerehuni kemitiumi

28 'Ixaheritsixi mariyanitsixi mekateni-waruta'uximayatsitiani. Huta tewiyari wiyari kepauka Kerehuni muyeikakai 'akuxi tawariri metehayu'iwati mepikahaki kayuwati mehexeiyati mekanakine 'ixaheritsixi.

29 Yeruwahari Kuhatsi nu'aya kanakunuani yukie mukaniki.

30 Haika tewiyari heimana tamamata yuniwema kaniwarayexeiya, 'itamama memiyuwaikawakaiki.

31 'Ukaratsi miti'uximayatsirie kai, Tsikeni mukatei hetsiemieme xeimeta kanayexeiya, Kerehuni 'Awimereki katiniteriwa

32 Kerehuni kaniumi Kuhatsi nu'aya, kaniuka-teukieni Kuhatsi makateukietsie 'Upira kiekari-yaritsie, 'Awietsexi xiiyarimama mematitekaitsie.

33 Kepauka mumi Kerehuni, 'ixaheritsixi tawarita 'axamekateniuyurieni kakaiyarixi Wahari hetsia miemete mewarayexeiyati mekanakine. Wahari-Weriti mekananayexeiya miwakakaiyaritiniki.

34 'Ixaheritsixi Yawé mekanatimaiya yukakaiyari, miwaruparewi kepauka hipati memiwa'uximatiakaitsie.

35 Metatsiere Yeruwahari Kerehunititi niwemama mekapıwanaki'eriekai, tsepa 'aixia mitiuyuriekai 'Ixahehi hetsiemieme.

9

'Awimereki

1 'Awimereki Yeruwahari nu'aya kaneyani, Tsikeni wareuxeyamieka yu'iwama yumaamat-siemieme, mipai katiniwarutahiawe yunaime yumaama niwemama:

2 «Xekeniwaruta'iwawiya yunaime teiteri Tsikeni kiekatari: “¿Kehepai tixenake matsi: memitexeta'aitiani haika tewiyari heimana tamamata Yeruwahari niwemama, nutsi xewiti xeikia pitixe'aitiaka?” Xekenaye'eri ne matsi nekanixe'iwatini».

3 Kepauka maamaya 'iwamama yunaime teiteri Tsikeni kiekatari mipai memitewarutahiawixi, miki mepuyuwari 'Awimereki memiparewieniki mipai me'utiyuati: «Miki pita'iwa».

4 Mekani'itiani pirata tuminiyari haika tewiyari heimana tamamata Wahari-Weriti kiita mieme, mikiki 'Awimereki hipame 'axamemite'u'iyari kaniwaruta'inieni memiparewieniki.

5 Kaneyani 'Upira kiekariyaritsie, yupaapakie, xeiteteyariki mana haika tewiyari heimana tamamata yu'iwama kaniwarukwini, Yeruwahari niwemama, Yeruwahari nu'aya Kutani 'etsimiyumate yuti'awietaka mipai katiniuyuta'una.

6 Yunaiti Tsikeni kiekatari meta Weti-Miru kiekatari mekaniuyukuxeurieni, xiu manuwe

tete manuka mĩpatsie Tsikeni, 'Awimereki memanakurunatĩaniki mĩti'aitametĩniki.

⁷ Kepauka Kutani mĩretima, kananutiyani yemurĩtsie Keritsini mĩtitewatsie, mĩpai karima katiniwareukahiwiēni:

«Xekeneneu'eni, teiteri Tsikeni kiekatari,
Kakaiyari xemeta kexe'u'eniēni.

⁸ »Merikitsi kiyexi 'iteĩriyari xeime mekananayex-eiya

mĩtiwata'aitĩaniki.

Hiki huriwu mĩpai mekatēniutahiawe:

“Ketatineuta'aitia 'eki”.

⁹ Peru huriwu mĩpai katiniwarutahiawe:

“¿Kamĩtsi netihayewa hatseiti nexuawitiati?

miki 'aixia memi'itĩarie kakaiyarixi meta teiteri,

para xeheima xeikia nemuyuaneniki”.

¹⁰ »Hikita 'iteĩrite xapa 'iteĩriyari mĩpai mekatēniutahiawe:

“Ketatineuta'aitia 'eki”.

¹¹ Peru xapa 'iteĩriyari mĩpai katiniwarutahiawe:

“¿Kamĩtsi netihayewa xapa 'ikwaxiyari

witsimĩrakaka nexuawitiati?

Para xeheima xeikia nemuyuaneniki”.

¹² »Hikita 'iteĩrite kaxie 'iteĩriyari mĩpai mekatēniutahiawe:

“Eki ketatineuta'aitia”.

¹³ Kaxie mĩpai katiniwaruta'eiya:

“¿Kamĩtsi netihayewa winu newewieti,

miki kakaiyarixi mĩwatēmawieritia meta teiteri?

Para xeheima xeikia nemuyuaneniki”.

14 »'Imatirieka yunaiti 'iteirite xuya 'etsimutewi
mipai mekateniutahawe:

“‘Eki ketatineuta'aitia”.

15 Xuya mipai 'iteirite katiniwaruta'eiya:

“Xika yuriki xenetsi'anayexeiya
nemitixe'aitiakaki,
'axekenakini xekeneyu'awietani ne'etiriyatia,
xika mipai xeka'uyini, xuyatsie tai
keyenuiwa,
naime ke'utixitsitiani kariuxa Riwanu
mieme”.

16 »¿Kamitsi 'aixia xete'uyuri 'Awimereki
xemanakurunatia yuri xete'i'eririeti? 'Aixia
xetewaku'eriya Yeruwahari niwemama, keyeme
mireuyewetse wahepaitsita.

17 Nepaapa puyutami xehetsiemieme
yutatuati puxe'utawikweitsitia mariyanitsixi
kememitexe'uximatiakai.

18 Peru hiki 'axaxepite'uyuri, nepaapa
niwemama xepiwarukwi haika tewiyari heimana
tamamata xetitetyaritsie, 'Awimereki meta
ti'aitame xete'ayeitia, Tsikenitari mitiwa'aitiakaki,
nepaapa miti'uximayatsiriekai nu'aya mixe'iwaki
xeikia.

19 Xika hiki 'aixia xetewaku'eriya Yeruwahari
niwemama, xekeneyutemamawieka 'Awimereki
hamatia, mikita xehamatia keyutemawieka.

20 Xika mipai ka'aneni, Tsikeni kiekatari meta
Weti-Miru kiekatari, 'Awimereki hetsie tai
ke'ayeneni mekexe'utixitsitiani, xehetsieta tai
ke'ayeneni 'Awimereki ke'utaxitsitiani».

21 Miya'utayika Kutani kaniuyuta'una, kaneyani
Wehexi kiekariyaritsie paiti. Mana 'ukaiti
kanayani yu'iwa 'Awimereki mimakakaiki.

22 'Awimereki katiniwaruta'aitiakaitiniri 'ixa-heritsixi haika wiyari,

23 kepauka Kakaiyari 'iyari 'axami'ane meyen'i'a 'Awimereki hetsie meta Tsikeni kiekatari wahetsie, 'ana mekaniku'eirieni.

24 Mipai katiniuyini 'axamemiwaruyuriki Yeruwahari niwemama haika tewiyari heimama tamamata, waxuriya memutayeuriki, wa'iwa hetsie mitinakeki 'Awimereki miwarukwikai, meta teiteri Tsikeni kiekatari memiparewiekai.

25 'Ukitsi Tsikeni kiekatari tirikia hiritisie mekanitihupakaitini, mana mekateniwanawairietiwekaitini kemi'ane mana memuyekikakai. 'Awimereki katinetimani miki hepaitisita.

26 Hiki mana kaninuani Kahari 'Eweri nu'aya Tsikeni, 'iwamarixi yunaiti, mana kiekatari hetsiena mekatenuwiya.

27 Yuwaxata me'anukineka meta kaxie takari me'utiketsika, 'ixiarari mekanatinetiani yukakaiyari tukita. Kepauka memitekwwakai meta memi'iekai 'Awimereki 'axamekatenuutamani.

28 Kahari 'Eweri nu'aya mipai kaniutayini: «¿Ketita tiyu'erie 'Awimereki, ketitata Tsikeni tihiki para miti'uximayatsiriekaki? Yeruwahari nu'aya tamikatihiki, Tsewuri meta ti'uximayatsiriwame katihiki. Kamuxi niwemama Tsikeni paapaya ketiwa'aitiaka. ¿Titayari 'Awimereki tete'uximayatsiriekaka?

29 Xika 'iki teiteri ne netiwa'aitiakake, ne 'Awimereki nepanakahianikuyu, mipai nepititahawiwe: Keniwarukuxeiri yunaime 'akuyaxima hikimi tepitatakwinini».

30 Tsewuri, kiekari mihiritiariekai,

kaniuyeha'ani waikawa kepauka mu'enaxi kemutainekai Kahari 'Eweri nu'aya.

³¹ Hiki 'awie kaniwareni'ani texaxatamete 'Awimereki hetsia, mipai tiwarahiaweti: «Kahari 'Eweri nu'aya meta 'iwamama Tsikeni mepu'axia yunaime 'axamepitewakihawe 'ahepaitsita.

³² Xekenanuku'uti 'ateiterima xeyunaiti tikariki yeuta xekeniwaruhupi.

³³ Ximeri tau haneyu, kiekaritsie pekaniye'amiki. Kepauka Kahari mayeyani metsitamienike, 'ekitsi kemimatinake yaketineuyuri».

³⁴ Hiki 'Awimereki kananukukeni meta kuyaximama tikariki, mekaniuyuti'awieta yeuta Tsikeni heuhurakaku, me'ayenaukati kuyaxiyari mekanakine.

³⁵ Kahari 'Eweri nu'aya kiekari kitenie kaniuwekaitini, kepauka 'Awimereki memiwatiki mewahupieti.

³⁶ Kepauka Kahari miwaruxei mipai Tsewuri katiniutahiawe:

—Neuxei, teiteri tirikia mepakahu.

Tsewuri mipai katinitahiawe:

—Hiri 'etirieya pekatnixeyani.

³⁷ Peru tawarita Kahari mipai kaniutayini:

—Neuxei, hipatita xeime Yemuri hixiapa mukatsie mepakahu, hipatita Xiu manuwe memitemaiwawe wahuyeyari'utia.

³⁸ Hiki Tsewuri mipai katinitahiawe:

—Hikita para mipai keneutayiki, kepe-mutainekai: “¿Tita tihiki 'Awimereki temite'i'uximayatsiriekaki?” ¿Miki teiteri

mekatehiki pemiwaniukima? Ketsiari
keniwarutakuya.

³⁹ Kahari Tsikeni kiekatari wara'inieti 'Awimereki kaniutamieni.

⁴⁰ Peru 'Awimereki piwaranukuwei, meyu'unarimetu yumiireti mekaniukaxirieni huyeta kiekari kitenie paiti.

⁴¹ 'Awimereki 'Aruma kaniuyuhayewa, Tsewuri Tsikeni kiekariyaritsie Kahari meta 'iwamama kaniwarayeweiya.

⁴² 'Uxa'arieka teiteri Tsikenitsixi mekanayekine yu'etsarita, mipaita katiniutahiawarieni 'Awimereki.

⁴³ Hiki 'Awimereki yuteiterima kaniwarukuxerieni haika kuyaxiyari kaniwarayeitiani, mekaniuyuti'awieta 'etsarita. Kepauka memiwaruxei kiekaritsie mewayekikame, mekananuku'uni mewatakwinike.

⁴⁴ 'Awimereki meta hamatiana memuhukai mekaniutinautsa kitenie memu'uniki. Huta kuyaxiyari, yu'etsarita memu'uwakai mekaniwarukwini.

⁴⁵ 'Awimereki kaniyumienekaitini miki tukariki, yunaima teiteri warukwika meta kiekari naime 'uka'unaka naitsarie kwiepa 'una kaniutawiwiweni mikatitixuawereki.

⁴⁶ Mipai metehetimaika teiteri Tuxiyu Tsikeni mieme hetsie memakatekai, hiki mekaniyuti'awieta kakaiyari Weriti tukita 'aixia mirekunameta.

⁴⁷ 'Awimereki retimaika kename muwa mehayetekai,

⁴⁸ miki meta teiterimama mekanekine Tsarimuni hiriyaritsie. Hatsa 'utituka kiyexi

kaniutiwiteni yunaiparie kaneitixirieni. Yuteiterima mipai katiniwarutahiawe: «Yaxeikiata xeketeneuyuri kexeminete'uxei. Xeiya».

⁴⁹ Yunaiti teiterimama kiyexi mekanawitexiani 'Awimereki mekananukuweiya teiteri memiwayetei paiti, mana mekanikuxerieni kiyexi mekanitataiya. Mipai mekatenukwini teiteri Tuxiyu Tsikeni mieme taita memayetekai, xeimiriari mekanihikitikaitini 'ukitsi 'ukari.

⁵⁰ 'Ariketa 'Awimereki Tewetsi kaneyani, man-ata kanitahani kaniwarutiwiya.

⁵¹ Miki kiekaritsie tuxiyu kaniuwekaitini, mikita mekanuiyuta'unakaitini, 'ukitsi 'ukari. Mekaneuyunani miki tuxiyuta wapaiti mekananutikine.

⁵² 'Awimereki tuxiyu manuwe kaniye'ani kaniwarutakwini. Peru kepauka 'ahurawa mumiekai 'itaiyake,

⁵³ 'ukaratsititi kaneikatuaxa tete titiximeki 'Awimereki mu'uyatsie kaniukaweni, mu'uya kaniutatare.

⁵⁴ Yapauka 'Awimereki yihiweme kaniuta'inieni mipai katinitahiawe: «'A'ixipara kenewatihani keneneumi'a, mipai nemikaraxaxatsiwaniki: "Ukaratsi kanimieni"». Hiki 'ihiweme yu'ixiparaki kanitseni, mipai katiniumini.

⁵⁵ Kepauka 'ixaheritsixi 'Awimereki memuxei mikime, yukie mekanakunuaxiani.

⁵⁶ Mipai Kakaiyari 'Awimereki katinakapitiani, yupaapa hepaitsita 'axamitiuyuriekaiki yu'iwama miwarukwikaiki, haika tewiyari heimana tamamata.

⁵⁷ Metatsiere, teiteri Tsikeni kiekatari 'axamemite'uyuriki memite'ayukatuaniki,

Kakaiyari katiniuyurieni. Mipai katinaye'ani
Kutani ke'axamiwaruyuriki Yeruwahari nu'aya.

10

Turaxi

¹ 'Awimereki 'utia xewitita 'aniutakeni,
'ixaheritsixi miwatawikweitsitianiki 'Itsakaxi
xiiyarieyatiti. Turaxi katinitewakaitini, Puwa
nu'aya, Ruru teukarieya. Tsamixi kiekariyaritsie
kaniukateitini 'Epirahini hiriyaritsie,

² 'ixaheritsixi katiniwaruta'aitiani xeitewiyari
heimana haika wiyari, hiki kaniumini, Tsamixi
kiekariyaritsie kaniukateukieni.

Yahixi

³ Turaxi 'umiku 'arike Yahixi 'itsikame kanayani
Karahi kiekame, katiniuta'aita xeitewiyari
heimana huta wiyari.

⁴ Xeitewiyari heimana tamamata kani-
warutinuarieni, yuxexuiti miki yupuxuritsie
mekananutiyaxikekaitini, meta yuxexuiti
mekateni'aitakaitini xeikiekariyaritetsie Karahi
kwieyaritsie. Hiki 'akuxi miki kiekarite mipai
katinematiwani «Yahixi kiekariteya».

⁵ Kepauka mum Yahixi, kaniukateukieni Ka-
muni kiekariyaritsie.

Ketexi

⁶ Tawarita 'ixaheritsixi Yawé kemikatinake
mekateniuyurieni, Wahari kakaiyarixiyari meta
'Atsitaruti 'ikiyarite, 'Arami, Tsiruni, Muhawi,
'amunitsixi meta piritsiteutsixi wakakaiyarixi
pita mewarayexeiya mekanakine. Mipai
'ixaheritsixi Yawé mekateniuku'eirieni,

⁷ hiki Yawé kaniwaruyeheka 'ixaheritsixi, kaniwayetuani pirsitsiteutsixi wahetsia meta 'amunit-sixi wahetsia,

⁸ mana mītiyehane tamamata heimana 'atahaika wiyari, 'ixaheritsixi teiteriyari mekatenuka'eniwakaitini Karaha memitamakai, 'amuxeutsixi wakwieyaritsie, Kurutani 'anutaie.

⁹ 'Amunitsixi tsiere mekananukine Kuru-tanitsie, Kura xiyyarimama meta Wenikamini 'Epirahini mewatakwinike, mikiki 'ixaheritsixi waikawa mekatenukweinekaitini.

¹⁰ Hiki 'ixaheritsixi Yawé hetsia parewiya mekaniutawauni:

—Kemikamatinake tepite'uyuri, tematsi'uku'eiri takakaiyari, Wahari hetsia miemete pita kakaiyarixi tewarayexeyati tepaki.

¹¹ Yawé mipai kaniutayini:

—Kepauka 'ekipitutari, 'amuxeutsixi, 'amunit-sixi, pirsitsiteutsixi,

¹² tsiruniyutsixi, 'amarekitsixi meta mariyan-itsixi, memixe'uximatiakai xemeta parewiya xeputawau nehetsia nemixeparewieniki, kamitsi nekatixe'uxinaxi.

¹³ Peru xeme xepinetsi'uku'eiri, hipame pita kakaiyarixi wahixie xepukatunuma'uwe, 'ayumiemi nepikaxetawikweitsitiani.

¹⁴ Xekenehu xekenewaretawawiri kakaiyarixi xemiwarayexeya. Miki mekexehetawikweitsitiani kexemitehe'uximatiarie.

¹⁵ Peru 'ixaheritsixi Yawé mipai mekatenu-tahiawe:

—'Axatepote'uyuri. Yaketineuyuri tahet-sie kematicake, peru tepimatsiwawirie pemitatsitawikweitsitiani 'iki tukaritsie.

16 Hiki kakaiyarixi mekaniwaruku'eirieni memiwarayexeiyakai, Yawé me'ayexeiyati pita mekanakine, meta Yawé pikaiwekairi mitinewieka, 'ixaheritsixi kememite'uka'eniwakai.

17 Kepauka 'amunitsixi memuta'inierie Karaha mekanikuyaxe, 'ixaheritsixi mekaniyukuxeirieni, Mitsipa mekanitiyaxe meyukuha'aritanike.

18 Memanuyetei meta yunaiti teiteri mipai mekateniyukihawekaitini: «Kemi'anemeri mitsutiani 'amunitsixi temiwatakwinitisie miki ti'aitame kanayeimiki Karaha kiekariyaritsie».

11

1 Ketexi Karaha kiekame kwinimieme katineuyutamiewekaitini, Karaha nu'aya meta 'ukaratsi tuminiki muyuwitini nu'aya.

2 Karaha yuniwema kaniwarayexeiya yu'iyatsie, miki kepauka memutiwawerixi Ketexi mekaniutaweiya. Mipai mekatenitahawe: «'Eki 'ahetsie pikatinake tita tapaapa mitatiku'eiririeni, xewiti pita mi'amaamaki».

3 Hiki Ketexi kaniuyuta'una 'iwamama miyame'utiyuaku, kaneyani Tuwi kwieyaritsie, mana hipati mekanitinini 'axamete'u'iyariti, mekaniku'uwakaitini 'axametekuyurieti.

4 'Arikeke kepauka 'amunitsixi 'ixaheritsixi memiwarutakwi,

5 'ukirawetsixi Karaha kiekatari Ketexi mekanekuwitini Tuwi kwieyaritsie paiti.

6 Mipai mekatenitahawe:

—Hikimi, pamanuyehaitiani pepayani, 'amunitsixi temiwatakwiniki.

7 Ketexi mipai kaniutayini:

—Xeme xekateyia xeminetsi 'utixani'eri nepaapa kie xeminetsi'utawei. ¿Titayari hiki xenetekuwaitiwe, xeyumexiitiati?

8 'Ukirawetsixi Karaha kiekatari mipai mekatenitahiawe:

—'Ayumieme hiki tematsikuwaitiwe. Kimi 'amunitsixi tepiwaretakwini, meta Karaha kiekatari tiwa'aitiwame pepayani.

9 Ketexi mipai kaniutayini:

—Xika xenetsihewitini 'amunitsixi temiwaretakwiniki xika Yawé netsiheyetuirieni, hiki yuriki xehetsiemieme ti'aitame nekanayeimiki.

10 'Ukirawetsixi yuriki mehaitikaiti mipai mekatenitahiawe:

—Yawé tahetsiemieme pitimate: Yatepitayurieni kepemaineni 'eki.

11 Ketexi kaneyani 'ukirawetsixi Karaha kiekatari wahamatia, teiteri mekanenukakeni mitiwa'aitiakaki. Mitsipa katiniutaxata naime Yawé hixie.

12 Hiki Ketexi tupiritsixi kaniwareni'ani 'amunitsixi tiwa'aitiwame wahetsia, memeita'iwawiyaki:

—Ketita perayexeiya nehetsia, titayari 'uperamie neteiterima pewatakwinike.

13 'Amunitsixi tiwa'aitiwame Ketexi tupiritsixi-mama mipai katiniwaruta'eia:

—Kepauka 'ixaheritsixi memayeki 'Ekipitu, nekwie mepinetsi'unawairi 'Axinuni 'akiyari meta Kawuki 'akiyaritsie paiti ye'atikaime, meta Kurutani hatuxameyari paiti. Hiki keneneyetuiiri 'aixia 'iyari.

14 Ketexi tawarita tupiritsixi kaniwareni'ani, 'amunitsixi tiwa'aitiwame hetsia,

15 mipai tiwaruxatiaka:

«Ketexi mipai kanaineni: “Ixaheritsixi, 'amunitsixi wakwie mepikawarunawairi meta muhawitsixi.

16 Kepauka 'ixaheritsixi memayeki 'Ekipitu, makumawetsie mepuyeki Haramara Mixetatsie paiti mepu'axia, manata Karetsi paiti.

17 Hiki tupiritsixi mepiwareni'a 'Erumi ti'aitame hetsia, mipai metewarahiaweti: 'Ketaneupitia 'akwietsie temuyekineki'. Peru 'Erumi ti'aitame pikawarupitia. Yaxeikiata Muhawi ti'aitame mekatene'airieni yaxeikia mehaitikaiti, mikita yapikatiutanaki'eri. 'Ana 'ixaheritsixi Karetsi mekaniuyuhayewa.

18 »”Arikeke mekaniuhukaitini makumawetsie, 'Erumi kwieyari warita meta Muhawi, muhawitsixi wakwieyari 'aurie mekaniuyekine tau manatineika hepatsie, 'Axinuni hatiayari manuyeka 'anataiye mekaniuyuhayewa. Peru muhawitsixi wakwietsie mepikaheutahaxia, 'Arinuni kwieyari manuye'atika mihikitikaiki.

19 »”Hiki 'ixaheritsixi tupiritsixi mekaniwareni'ani Tsikuni hetsia, 'amuxeutsixi tiwa'aitiwame, Hetsiwuni miti'aitakai, mipai mekatenitahiawe: 'Ketaneupitia 'akwietsie temuyekineki takwietsie temeta'axianiki.'

20 Peru Tsikuni yuri pikatiwaruta'eriri, pikawarupitia kwieyatsie memuyekineki 'ixaheritsixi, yukuyaxima pita kaniwarukuxeri'eni Yahatsa mekanitiyaxe 'ixaheritsixi mekaniwarutakwini.

²¹ »"Yawé, 'ixaheritsixi wakakaiyari, Tsikuni kaniyetuani meta kuyaximama 'ixaheritsixi memiwara'iwaki. Mipai tiuyiku 'ixaheritsixi wakwie kanayani 'amuxeutsixi wakwie miki kwieyaritsie memu'uwakai,

²² naime mekunati 'Axinuni hatiaiyari meta Kawuki hatiayaritsie ye'atikame, makumawe meta Kurutani hatuxameyaritsie ye'akame.

²³ »"Yawé, 'ixaheritsixi wakakaiyari, 'amuxeutsixi kaniwarunawairieni yuteiterima miwayetuirieniki, ¿kamitsi 'ekita petatinawairieni?

²⁴ ¿Kamitsi 'eki 'apiinite pekarayeitiwa 'akakaiyari Kemuxi mimetiyeturiwa? Tameta yaxeikia tapiinite tepitehayetiwa Yawé takakaiyari mitatiyeturi.

²⁵ ¿Kamitsi 'eki Tsipuxi nu'aya Waraki Muhawi ti'aitame reuyeta petiyiweme peti'a'erie? Miki hatsuaku pikatatsi'uyehekaxi pikatatsi'utakwi tame 'ixaheritsixi.

²⁶ Haika tsienituyari wiyari kananyemieniri 'ixaheritsixi Hetsiwuni meta 'Aruhexi wapiinite hamatia, naiti kiekari 'etsimiyeyeu 'amiyeyeu 'Axinuni tetsita mukumanekai. ¿Titayari 'anapaiti mipai xekate'utiyua?

²⁷ Ne 'axanepikamatitahiawiwe. 'Eki pita 'axapepituriene nehamatia pepi'amiami. Yawé, mimariwe 'itsikame, yake'utayini ketemaku'ane 'ixaheritsixi meta 'amunitsixi"».

²⁸ Matsi, 'amunitsixi tiwa'aitwame Ketexi tupirit-siximama pikawaru'eni.

²⁹ Hik Ketexi, Yawé 'iyari 'ipitiaku, Karaha kaniuyeyani meta Manatsexi, Mitsipa kaniuyeyani

Karaha, manari 'amunitsixi wahetsia kaniye'ani.

³⁰ Ketexi Yawé yakatiniutahiawe mariwemeki:
«Xika yuriki penetsiyetuirieni 'amunitsixi,

³¹ kemi'ane meri miwayeyani nekiita
netsihanakimieka, nehakunuayu 'amunitsixi
newara'iwame, Yawé hetsia mieme kanayeimiki,
hetsienamieme nekanitataiyamiki».

³² Ketexi hapa kananuyani 'amunitsixi watak-
winike, Yawé kaniyetuirieni.

³³ Xeitewiyari kiekari kaniuka'una, 'Aruhexi
ye'atikaimi Miniti paiti, 'Aweri-Keramini paiti.
Waikawa mekatenuyurieni. 'Amunitsixi mipai
'ixaheritsixi mekateniwaruta'aitiani.

³⁴ Kepauka Ketexi yukie munua Mitsipa,
niweya kanayeyani 'enunakeke, tiyuitiaximeti
tiuneiximetri. Ketexi niweya 'uka puyuxewikai
meta 'ukitime yuniwe pikahexeyakai.

³⁵ Kepauka Ketexi mixei yukamixa kaneukat-
sana, mipai kaniutayini:

—'Ai, neniwe, yemeki 'aixia pepikanetsi'uyuri.
'Eki peyiyu 'aixia nepikayini. Ne Yawé yiki
nepitiutahiawixi, nemiti'itani nepikayawe.

³⁶ Miki mipai kaniutayini:

—Nepaapa, Yawé kepemitiutahiawixi
kenaye'atia nehetsie, miki pimatsi'uparewi
'amunitsixi pemiwara'iwaki.

³⁷ Mipai xeikia nepimatitahiawe, hatsuaku
nepikatiwikieni, huta metseri keneneukwewi
hiritsie nemiyemieki muwa nemetitsuaniki 'ukari
nemíwanaki'erie wahamatia.

³⁸ Miki mipai katinitahiawe:

—'Aixia pi'ane kenemie.

Nipitiani miyemieki huta metseri. Miki 'ukari muwanaki'erie meyunaiti menekine hiritsie, mana kaniutitsuani hatsuaku mikatiwikienikekaiki.

³⁹ Huta metseri haye'aku yupaapa hetsia kaninuani, miki yakatiniuyurieni kemutayikai. 'Uka pikatiwikiwekai.

Mana mitiyehane 'ixaheritsixi me'iku'eriwati mekanakine

⁴⁰ mipai meteyurieti, xeiwiyari 'anuyeyeikaku 'ukari 'ixaheritsixi nauka tukari hiwerika 'ixiarariyari mekaniutiwewiwakaitini, kepauka mumi Ketexi niweya 'uka Karaha kiekame hetsiemieme.

12

Ketexi 'Epirahini hamatia

¹ Teiteri 'Epirahini kiekatari mekaniuyukuha'aritanii, hapa me'anukineka Tsapuni paiti Ketexi mipai mekateniutahiawe:

—¿Titayari 'amunitsixi petiwarutakwi pekatatsi'u'enieka 'ahamatia temuhukai? Hiki 'akii, tekanitataiyakuni, muwa paiti pe'ayekaima.

² Ketexi mipai kaniutayini:

—Ne meta neteiterima, 'amunitsixi wahamatia tepayuye'uniekai kepauka tewatakwinike temixe'iniekai, xeme xepikayutawairi xemitatsiparewieniki.

³ Kepauka nemunierixi kenama xekanetsiparewieni, ne nepunetatua, nepetia 'amunitsixi newatakwinike, hiki Yawé pinetsi'uparewi pinetsiyetuiri. ¿Titayari kuta xeme hiki xenetemieku?

4 Hiki Ketexi Karaha kiekatari kaniwarukuxeirieni mekaniwarutakwini, 'Epirahini xiiyarimama. Karaha kiekatari mekaniwara'iwa 'Epirahini kiekatari mipai memitewarutahiawixiki: «Xeme Karaha kiekatari 'ena xeikia xekaniyu'awietani 'Epirahini xiiyarimama meta Manatsexi».

5 Karaha kiekatari Kurutani hatuxameyaritsie mekaniu'uixiani 'etsimatiyeyeutsie 'Epirahini huyeyari manuhapane, kepauka 'Epirahini kiekame memuyuhayewaxi mipai memutiyanekai: «Xekeneneupitia mana nemuyaniki», teiteri Karaha kiekatari mipai mekateniwaku'iwawiyakaitini: «¿'Epirahini nuiwarieya petihiki?» Xika miki mipai 'utayini: «Hawaiki»,

6 miki mipai mekaniutiyanekaitini: «'Aixia kani'aneni, tsipara “Tsiwure” keneutayiki». Xika «Tsipure» 'utayini, 'ana mekaniwatawiwiyakaitini mekaniwaranutiwitekekaitini mana Kurutani hapa memanukikatsie waniukiki miki mepikaniuwawekai. Mipai mete'uyurieku mekaniukwini huta tewiyari heimana huta miriyari 'Epirahini xiiyarimama.

7 Ketexi katiniuta'aita 'ixaheritsixi wahetsie 'ataxewime wiyari. Kepauka mumi Ketexi Karaha kiekame, kaniukateukieni yukiekaritsie Karaha.

'Twitsahani, 'Eruni meta 'Awiruni

8 Ketexi 'utia 'Twitsahani 'ixaheritsixi wahetsiemieme manuyeka kanayani Wereni kiekame.

9 Xeitewiyari heimana tamamata 'ukitsi kaniwarutinuarieni meta xeitewiyari heimana tamamata 'ukari. 'Ukari kaniwarutiwikitiani kayu'iwama wahetsia, 'ukitsi wahetsiemimeta

kaniwa'atiani xeitewiyari heimana tamamata hipame kayunuiwari hetsiemiemete. 'Iwitsahani 'ixaheritsixi wahetsiemieme manuyeka kanayani 'atahuta wiyari.

¹⁰ 'Iwitsahani Kepauka mumĩ kaniukateukieni Wereni kiekariyaritsie.

¹¹ 'Utimana 'Eruni 'ixaheritsixi wahetsiemieme manuyeka kanayani, Tsawuruni nuiwarieya hetsiemieme tamamata wiyari.

¹² Kepauka mumĩ 'Eruni Tsawuruni nuiwarieya hetsiemieme, 'Ayaruni kiekariyaritsie kaniukateukieni Tsawuruni kwieyaritsie.

¹³ 'Eruni 'utia 'Awuruni 'ixaheritsixi wahetsiemieme manuyeka kanayani Hireri nu'aya, Piratuni kiekame.

¹⁴ Huta tewiyari kaniwarutinuarieni, meta teukarimama xeitewiyari heimana tamamata mekanihikĩtikaitini, miki yuxexuiti yupuxuritsie mekananutiyaxikekaitini. 'Ixaheritsixi wahetsiemieme manuyeka kanayani 'atahaika wiyari.

¹⁵ Kepauka mumĩ 'Awuruni Hireri nu'aya, kaniukateukieni Piratuni kiekariyaritsie, 'Epirahini kwieyaritsie, hiritsie 'amarekitsixi wakwietsie.

13

Kemitiutinuiwaxi Tsanitsuni

¹ Merikitsi tawarita 'ixaheritsixi 'axamekatenuyurieni, Yawé kemikatinake. 'Ayumieme kaniwayetuani pirtsiteutsixi wahetsia huta tewiyari wiyari memi'uximatarieniki.

² Xewiti tewi Tsura kiekame, Manuhani titewati, Rani xiiyarieyatiti, yu'ia kanexeiyakaitini kaniweweme.

³ Peru niuki tuayame Yawé hetsia mieme matsiikime kanayuyeitiani hixiena mipai katinitahiawe: «'Eki pemikaniwewe, tiri pemwarayexeiya pemikayiwe, peru pepitihukata 'ukitime pepitiniweni.

⁴ Kene'a'iwiyani kaxie winuyari pepika'ieka meta tiriku nawayari, meta tita naiti mitimaiwe pepikatikwaka,

⁵ pekanitihukatamiki 'ukitime pekanitiniwemiki. Pikakaxirieni yumu'utsie nawaxaki, miki nunutsi natsareyu kanayeimiki, Kakaiyari hetsiemieme pipatsieka katinuiwaweti 'akuxi. Miki kaniwaxinamiki 'ixaheritsixi pirtsitsixi wahetsia».

⁶ 'Ukaratsi kaneyani yukina hetsia mipai katinitahiawe: «Xewiti 'uki Kakaiyari hetsia mieme nehetsia pekuyeixia. Yiki tiyuxexeiyati, niuki tuayame Kakaiyari hetsia mieme hepai tiyuxexeiyati. Ne nepikaheita'iwawiyaxi hakewa meyetia, mikita pikanetsihetaxatia kemiretewakai.

⁷ Peru mipai pinerahiawekai: “Pekanitihukatamiki 'ukitime pekanitiniwemiki. Hiki keneyu'iwiyani kaxie winuyari pepika'ieka meta tiriku nawayari, meta tita mitimaiwe pepikatikwaka, nunutsi natsareyu* kanayeimiki, patsieti Kakaiyari hetsia miemek katinuiwaweti

* **13:7 13:7** natsareyu. *Xika xewiti 'ixaheri yukahini tixaiti mikatikwa'aniki mipatsiekaki tixaitiki miti'uximayakaki Kakaiyari hetsiemieme. Keneuxeiya 'Inia 6:1-21.*

'akuxi, kepaukake mumini"».

⁸ Hiki Manuhani Yawé kaniutahiawe: «Yawé 'aku, yemeki nematsiwawirie pemeipitianiki tawarita munuaniki tewi Kakaiyari hetsia mieme pemitatsiheyeni'airi, mitatita'ikitianiki ketemite'iweriya nunutsi mitinuiwa».

⁹ Kakaiyari Manuhani kaniu'enieni, niuki tuayame kaninuani 'ukaratsi hixie kaniyuhekiata yeuta 'uyeikakaku, Manuhani hamatiana pika'uyeikakai.

¹⁰ 'Ukaratsi yapauka kaniutanautsa yukina re-taxatianike: «'Ena puyeika. Tewi muyuhekiataxi takai'atu».

¹¹ Manuhani 'anukukeka yu'iya kaneweiyi. Kepauka munua hakewa tewi mewekai, mipai katinitahiawe:

—'Eki petiyianekai ne'iya pemitutaxatia?

Miki mipai kaniutayini:

—Huu, ne nepihiki.

¹² Hiki Manuhani kanita'iwawiya:

—Kepauka yamiraye'ani kepemutayi, nunutsi ketete'iweriya. Ketikamieni.

¹³ Niuki tuayame Yawé hetsia mieme mipai kaniutayini:

—'A'iya yaketikayani naimenemtitahawixi.

¹⁴ Kaxie hetsie timieme pikati'ieka, meta kaxie winuyari pika'ieka meta tiriku nawayari, meta tita mitimaiwe pikatikwaka. Yemeki, yaketikayani kenemirehiawe.

¹⁵ Manuhani niuki tuayame Yawé hetsiamieme mipai katiniutahiawe:

—Mana 'akuxi yaketineutewini, tsipu 'itsariyari tepimetsihekawewirieni pemitikwaniki.

16 Peru niuki tuayame Yawé hetsiamieme mipai katinita'eiya.

—Tsepa xeminetsi'ukunuitia, tixaiti nepikara'iniata xe'ikwai. Peru xika pe'itataiya, Yawé keneuxatia.

Manuhani miki niuki tuayame Yawé hetsiamieme pika'eriekai.

17 Hiki mipai katinita'iwawiya:

—Kepetitewa, para 'aixia 'anemeki tematsi-hahaweniki kepauka yamitiyini kepemutayi.

18 Miki mipai kaniutayini: ¿Titayari penera'iwawiya kenemititewa? Tewi pikayiwe kenemitimariwe yamiretimaniki.

19 Hiki Manuhani tsipu kanewayehana, hiki hat-site mawariyari mame tiutiniitiaka, tetetsie kanimieni kaniyetuani Yawé hetsiamieme. Metane-nierekaku Manuhani meta 'iyaya, Yawé mariwemeki katiniuyurieni wahixie:

20 Kepauka tai muyuawitsie meuti'ekekai tetexitsata hatineikati, niuki tuayame Yawé hetsia mieme nerikwari tsata kanitimiekaitini. Miya mete'uneniereka Manuhani yu'itati kwiepa mekaniukahixima'uni.

21 Miki niuki tuayame Yawé hetsiamieme tawarita pika'uyuhekiataxi Manuhani meta 'iyaya wahixie. Hiki 'ana Manuhani mipai paretima kename niuki tuayame Yawé hetsia mieme yianekai.

22 Hiki yu'iya mipai katiniutahiawe: Tame tepikwini, Kakaiyari tepuxei.

23 Peru 'iyaya mipai kaniutayini:

—Xika Yawé tatsikwimikinike, tamawari pikatitanaki'erieniekekai meta hatsite temiyetuiri

meta mipai pikatatihekiatsitiyakekai
nipikatatitaxatianikekai.

²⁴ 'Ukaratsi 'ukitime kaniutiniweni, Tsanitsuni
katiniteriwa. Nunutsi kaniutawere Yawé 'aixia
kaniyuriekaitini.

²⁵ Yawé 'iyarieya hetsiena kanitsutiani
'ikuyuitiwati kemitiyurienenikekai, kepauka
Makane-Rani muyeikakai, Tsura 'Etsitahuri
wahixiapa.

14

Tsanitsuni kemitiutineikixi

¹ Hiki Tsanitsuni kaneyani Timinati
kiekariyaritsie, mana 'uka kaniuxeiya
piritsiteutsixi waniwe kanitihawe'erieni.

² Kepauka makunua yupaapama mipai katini-
warutahiawe:

—Timinati mirakutewatsie 'uka nepexei netsi-
nakeme piritsiteutsixi waniwe, xekeneutawawa
nemitiwitiniki.

³ Peru paapamama mipai mekatenitahiawe:

—Kamitsi xewiti tiumawe ta'iwatiti matsinaketi
naitserie 'ena mitiuyehane titayari piritsiteutsixi
watsata petiwauneni xitekiya 'inariyari
memikahexeiya wahetsia.

Tsanitsuni yupaapa mipai katiniuta'eiya:

—Miki xekeneneutawawiri, waikawa ne
pinetsinake.

⁴ Paapamama 'atsimepikatemalaikai Yawé
tiyurieneme mepika'eriekai, miwaunekai
piritsiteutsixi miwayehaxiatianiki, 'ana
piritsiteutsixi 'ixaheritsixi mepitewa'aitiakai.

5 Hiki Tsanitsuni Timinatitsie kaneyani yupaapama wahamatia. Kaxie ma'iteiritsie me'aye'axiaku Timinati miemetsie, yapauka maye temaiki ha'ati Tsanitsuni kananukunake.

6 Peru Yawé 'iyarieya yutirikarima Tsanitsunitsie kaninuani, miki yumamaki kanimieni xewiti muxa nunutsi mumieni hepai. Miki pikatiwarutaxatia yupaapa yumaama kemiranayetia.

7 Hiki kaneyani 'uka hamatia katinetixata minakekai.

8 Miixa tukari 'anukayaku, kepauka makunua 'itiwitinike, huniuyune huyeta 'ixeiya ke maye mimiki, hetsiena xietexi kaniwaruxeiya meta mehayemakame.

9 Yumamaki xiete yapaimeme wayetuka 'ikwaiximeti kaniumiekaitini. Kepauka yupaapama miwaranuku'axixi kaniwarumini, mikita mekanitikwani, katiwaraxaxatiwati kename maye kaxarita heyetukai,

10 Hiki paapaya 'uka hetsia kananuyani. Mana Tsanitsuni 'ixiarari kaniuwewieni, temari kememite'uhukai.

11 Kepauka piritsiteutsixi memixei, xetewiyari heimana tamamata temari mekaniyetuirieni memiteitaniki.

12 Tsanitsuni mipai katiniwarutahiawe:

—Tsipara xekapitehetimani titatihiki. Xika xetehetimani, 'atahuta tukari kemireutetere 'iki 'ixiarari, ne nepixeyetuirieni xetewiyari heimana tamamata rinu kamixayari meta xetewiyari heimana tamamata kamixate 'ixiararipa mieme.

13 Peru xika xekaheitimani, xeme pita xepinetsiyetuirieni xeitewiyari heimana tamamata rinu kamixayari meta xeitewiyari heimana tamamata kamixate 'ixiararipa mieme.

Miki mipai mekatenita'eiya:

—Ketaneutaxatia, tame tekanita'enanakakuni.

14 Hiki mipai katiniwarutahiawe:

«Mitiyukwa'atsie 'ikwai pirane, mitirika'yetsie rakakati pirane». Haika tukari kananukayani, mepikaheitima ketiti manuyinekai.

15 Naurieka tukaritsie 'iyaya mipai mekate-niutahiawe: «'Akina keneuti'iwawiya mimatitaxatianiki 'ekita pemitatitaxatianiki, yamipai pepikatiuyuri, tame temenitataiyakuni meta 'apaapa niwemama yunaime. Xeme xetate'inie xeikia xetatenawairiekuti».

16 Hiki Tsanitsuni 'iyaya 'utatsuati hetsiena kaniuweni, mipai katinitahiawe:

—Pepinetsixani'erie.

Yuriki

pepikanetsinaki'erie. Niuki pemwarutaxatia nekie kiekatari memeitimaniki, peru ne pepikanetsitaxatiawe kehepaititi manuyine.

Miki mipai kaniutayini:

—Nepaapamatiti mipai nepikatiwarahiawe, titayari 'eki nemaraxaxatiwani.

17 Peru miki kaniutitsuani 'atahuta tukari kemireuterixi 'ixiarari, 'imatirieka tukari, Tsanitsuni yakatinitahiawe, miki wairiyarika yamitikihiawekaiki. Peru miki muyi yukie kiekatari katiniwarutaxatiani kehepai manuyinekai.

18 Tau kahakayuniwekaku 'imatiriekaka tukari mana kiekatari mipai mekatenitahiawe:

«¿Tita matsi waikawa rakaka xiete kemirakaka?
¿Tita matsi waikawa titirikaiye kemititirikaiye maye?»

Tsanitsuni mipai katiniwarutahiawe:

«Xika newakaxi 'imari xeka'utikwietsanatsitiiyake, xepikaheitimaniekai kenemitixe'uxatia».

19 Hiki Yawé 'iyarieya mitirikaiye Tsanitsuni hetsie kaninuani, hiki miki kaneyani 'Atsikaruni mana xeitewiyari heimana tamamata wateiterima kaniwarukwini, katiniwarunawairieni wapiinite, wakamixate katiniwarupitiani memitehetima. Hiki, ha'ati, kaninuani yupaapa kie.

20 Hiki Tsanitsuni 'iyaya kaniyetuiyani xeime hetsia, kepauka 'ixiarari miwewiekai hamatiana muyeikakai hetsia.

15

Tsanitsuni kemitiuyikihia

1 Miixa tukari 'anukayaku, tiriku 'itsa-narienekaku, Tsanitsuni tsipu nunutsi 'uwiyaka yu'ia hetsia kaneyani.

Heta'aka miki mipai kaniutayini:

—Ne'ia kiita nepeutia.

Peru 'uka paapaya pika'ipitia meutahaniki,

2 mipai katinitahiawe:

—Ne mipai nepitimaikai, kename pe'ixani'eriekai, 'ahamiku nepuwititia. ¿Matsi waikawa taruya kametinake? Kenanuwitiki, kurieyatsie mieme.

3 Tsanitsuni mipai kaniutayini:

—Hikirixia heitserie nepexeiya tsepa piritsiteutsixi kenemiwaruyuri.

⁴ Hiki kaneyani yeuta kaniwaretiwiya haika tsienituyari kauxaitsi, kaniwarakatapiexiani wakwaxitsie yuhuhutatame, hikota 'utsi tatikaime kaniwaranawitiriexiani,

⁵ hiki 'utsi kaniutaiyaxiani kauxaitsi kaniwarutatuani piritsiteutsixi wa'etsita. Tiriku naitserie kanayetaixiani mukuha'aritsiekairi meta 'akuxi 'amiti'ukai, naiti kaxie meta huriwa.

⁶ Kepauka piritsiteutsixi memuti'iwautiki: «¿Kemi'ane pituyuri?», miki mipai mekateniutahiawarieni: «Tsanitsuni katiniuyurieni, Timinati kiekame munieya, 'iyaya minawairiki hamikuya pita muwitiaki».

'Ayumieme piritsiteutsixi 'iyayatikai mekaniutataiya meta paapaya.

⁷ Peru Tsanitsuni mipai katiniwarutahiawe: «Miya xemite'uyuriki, nepikaka'uxipieni xete'ayukatuayuke».

⁸ Hiki kwinimieme tiha'ati kaniwarutakwini, yuwaikawame kaniwareuyehiani. Miyatiuyurieka kaneyani terita 'Etami 'aiyaritsie.

⁹ Piritsiteutsixi mekanekine Kura kwieyaritsie mekanitiyaxe, Rehi 'aurie.

¹⁰ Teiteri Kura kwieyaritsie kiekatari mipai meteniwaruta'iwwaiya:

—¿Titayari xetatekwiku tame?

Miki mipai mekaniutiyuani:

—Tame Tsanitsuni tepukuwautiwe temenutahianiki, yaxeikia temiyurieniki kemitatsiheyuri miki tame.

¹¹ Hiki Kura kwieyaritsie kiekatari haika miri-yari teiteri mekanekine terita 'Etami 'aiyaritsie mipai Tsanitsuni mekateniutahiawe:

—¿Pekatimate pirtsiteutsixi memitate'aitia?
¿Titayari miya petiyuriene?

Miki mipai kaniutayini:

—Matsi ne kememnetsiheyuri mipai xeikiata ne nepiwareyuri.

¹² Mikita mipai mekaniutiyuani:

—Tame tematsihianike tepeyeki, tematsiyetu-anike pirtsiteutsixi wahetsia.

Tsanitsuni mipai kaniutayini:

—Yaxekeneutiyuakatsi xika xeme xekanetsi-hemiekuni.

¹³ Miki mipai mekaniutiyuani:

—Kamitsi mipai pi'aneni, tematsihiani xeikia, wahetsia tematsiheyetuani. Tepikamatsihemieni.

Hiki mekanihiani kaunari hutameki hehek-wameki, terita mekanewayehana.

¹⁴ Rehi 'aye'aximekaku, pirtsiteut-sixi mekanayekine me'enukunakeke memite'ayu'iwani hepai mete'uhiwati. 'Ana Yawé 'iyarieya hetsiena kaninuani tirikaiyeti, kaunariki mihiakai mamayatsie rinu mitata'ini hepai kaniutiyini, yumamatsie mihiakai kaniuxine.

¹⁵ Puxu 'ayekwaiya hekwame 'utaxeiyaka mikiki kaniwarukwini xeimiriyari.

¹⁶ Hiki Tsanitsuni mipai kaniutayini:

«Puxu 'ayekwaiyaki

kaxarite kwinieneme nepiwaruke.

Puxu 'ayekwaiyaki

xeimiriyari teiteri nepiwarukwi».

17 Kepauka mitiutahayewaxi mipai tikuxatati 'ayekwai nehiani mana katiniuteriwa Xamati-Rehi.*

18 Waikawa meuharimikikaiki, Yawé kaniutahiawe karima: «'Eki pepitiuyuri 'iki mati'uximayatsiriwame mirayu'iwaki. ¿Kamitsita hiki hariyaki netimini, 'iki xitekiya 'iniariyari memikahexeiya wapiretsu nerayani?»

19 Hiki Kakaiyari kwiepa haa kanetinetiani Rehi kemiti'ane, muwa haa kanitinetiani watixawakaku. Kepauka Tsanitsuni mutihari, kaniutatirikaxiani 'aixia katineka'erietiyani. 'Ayumieme miki haixa hiki mana 'akuxi Rehi mitinena, «Kemi'ane mutahiwaxi haixaya» katiniuteriwarieni.

20 Tsanitsuni manuyehaitia kanihikitikaitini xeitewiyari wiyari 'ixaheritsixi wahet-sie, kepauka piri-siteutsixi 'ixaheritsixi memitewa'aitiakai.

16

Tsanitsuni Rarira hamatia

1 Heiwa xeitukaritsie Tsanitsuni Kahatsa kiekariyaritsie kananuyani, mana 'ukaratsi tuminiki muyumayinia kaniuxeiya. Hiki kiitana kaneutahani hamatiaana manuhuniki.

2 Kahatsa kiekatari mipai mekateniutahiawarieni: «Tsanitsuni 'ena puyeika». 'Ayumieme mekanaketikine, tikariki mekanihupiekaitini kiekari kitenie. Kayuwati mekaniumakaitini mipai me'utiyuati: «Kahekiareyu tekanimiekuni».

* 15:17 15:17 Hepirayuki Xamati-Rehi panuyine yemuri puxu 'ayekuaiya manuka.

³ Peru Tsanitsuni muwa kanayekateitini tikari hixiapa xeikia, 'ana kananukukeni, kiekari 'itupariyari kanau'una, naime kiyexi hutatu mikawetikatei 'iarime meta meukukeriwa naime. Yunaiparie heitimaka nei'ini hiritsie paiti Hewuruni kiekariyari hixie mukatsie paiti.

⁴ Miixa tukari 'anukayaku, Tsanitsuni xeime 'ukaratsi kaniutihiwe'erieni, mayeweritsie Tsureki kiekame, Rarira titewakame.

⁵ Piritsiteutsixi wa'ukiyarima hetsiana mekananukine mipai mekatenitahiawe: «Witsiketineutixatia, mimatitaxatianiki titayari kwiniemieme titirikaiye kehepai tetehe'iwa, tepihianikeyu tepite'ita'aitianikeyu. Tame teyuxexuiti tematsiku'itixiani xeimiriya heimana xeitsienituyari pirata tuminiya».

⁶ Rarira Tsanitsuni mipai katiniutahiawe:

—Kenetineutaxatia titayari kwiniemieme petitirikaiye, kehepai matsi'uyurieyu pimatsi'uhiani pimatituta'aitiani.

⁷ Tsanitsuni mipai kaniutayini:

—Xika netsi'uhiani 'atahuta tupi kaunariyari hehekwareki, 'ana nekanitaweranaxiamiki xeime tewi hepai nekaniyimiki mikatirikaiye.

⁸ Piritsiteutsixi wa'ukiyarima mekani'atirieni 'atahuta tupi kaunariyari hehekware, Rarira kanihiani kimana.

⁹ Hipati me'ita'awie'ixariekaku kiita, miki mipai katinihiwieni:

—Tsanitsuni, mana piritsiteutsixi.

'Ana miki kaunari mihehekwa kanakatekixiani, xewiti kaunari tsipianime makateke hepai.

Mipai 'akuxi pika'uhekiaxixi titayari kwinimieme mititirikaiyekai.

¹⁰ Rarira Tsanitsuni mipai katiniutahiawe:

—Pepinetiu'itai. Yaki peputayi. Xeiya, kenetineutaxatia kematiuhiani.

¹¹ Miki mipai kaniutayini:

—Maixa kaunariyari hehekwameki xika netsi'uhiani, nepitaweranaxiani xeime tewi mikatirikaiye hepai nepiyini.

¹² Hipati piritsiteutsixi 'awie me'ixeyakaku ki-ita, Rarira maixa kaunariyari hehekwame 'utihurieka kanihiani, hiki mipai katinihiwieni:

—Tsanitsuni, mana piritsiteutsixi.

Peru miki maixa kaunariyari kanakatekixiani mihiakai mamateyatsie, xeime hiru makateke hepai.

¹³ Hiki Rarira Tsanitsuni mipai katiniutahiawe:

—Hikitatsiere pepinetiu'itai, yaki peputayi. Kenetineutaxatia kematiuhiani.

Miki mipai kaniutayini:

—Xika 'atahutame nekipate pe'utitsani 'ixuriki miharuani nitikaimeki, miki mitsatikatsie 'iyehatiame xika netsi'akuwieni, mipai nepitaweranaxiani tewi mikatirikaiye hepai nepiyini.

Hiki kepauka Tsanitsuni mukutsukai, Rarira 'atahuta kipateya tsaiyatikaime kaniutiwewieni 'ixuriki nutikaime kaniutitsani

¹⁴ titse'imeki kanekuwieni kiyetsie.

Tawarita miki kanitahiwieni: «Tsanitsuni, mana piritsiteutsixi 'ahetsie». Tsanitsuni kepauka manutanierixi hetsiena makuwiekai naiti 'ixurikimati kanewatihune kiyetsie.

15 Hiki miki mipai katinitahiawe: «Pepikanetsinaki'erie, yuriki pepikanetixatiamiki. Hairiekari pepinetiu'itai, pepikanetitaxatiawe titayari kwinimieme pemititirikaiye».

16 Yaxeikia tikihiaweti mīxa tukari puyuri, yuniukiki kwinimieme katinihiweritiakaitini kanemimikikaitiniri.

17 'Imatirieka tinaime katinitaxatiani. Mipai katinitahiawe: «Ne nepikakaxiriewe, natsareyu nekanihikitini, nemupatsie Kakaiyari hetsiemieme nekatiniuiwaweti. Xika netsi'ukaxini, nekatirikaiyeti nekanayeimiki, xeime tewi hepai ne'aneti nekanayeimiki».

18 Rarira retimaika kename yuri titaxatia, pirsitsiteutsixi wa'ukiyarima kaniwarutakwewieni, mipai katiniwarutahiawe: «Tawarita xekenahu, miki naime kanetiniutaxatiani». Hiki pirsitsiteutsixi wa'ukiyarima mekaniu'axiani hetsiana, pirata me'a'iti memixatiakai.

19 Yutunutsie 'itimu'utsitiakaku kaneukuni, 'anari xeime tewi kaniuta'inieni 'atahuta kipaya mitsarietika maxixianiki. Mipai katina'iwarieni. Tirikariyaya kaneyani.

20 Hiki kanitahiawieni: «Tsanitsuni mana pirsitsiteutsixi».

Tsanitsuni 'anutaniereka mipai katiniu'erieni: «Nepineta'unata hiki, nepiwatawikweiya». 'Atsipikatimaikai kename Yawé 'iku'eirieikai.

21 Hiki pirsitsiteutsixi mekaniwiya, hixiteya mekanayetiki mekaneihana Kahatsa paiti. Mekaniwiwitiani wurunitse kaunariyariki, katsariyanata mekanitixitsitiakaitini.

22 Peru kepauka 'amemite'ikaxi kipateya, ya-pauka hutarieka kaniwawerekaitini.

Tsanitsuni kemitiumi

23 Piritsiteutsixi wa'ukiyarima mekani-uyukuxeiriēni 'ixiarari mewewienike meta mawari me'iwewirienike yukakaiyari Rakuni, mipai me'utiyuati:

«Takakaiyari pitatsiyetuiiri

Tsanitsuni mitatsi'aye'uniekai».

24 Kepauka yunaiti teiteri memixei yukakaiyari mekaniutaniawa, mipai me'utiyuati:

«Takakaiyari pitatsiyetuiiri

taneikixiwi,

takwiepa mitatsinanaimakai

meta ta'iwama miwakwikai».

25 Kepaukari waikawa memuyutemamaw-iekai, mipai mekateniuihiwa: «Tsanitsuni xekenewayehani 'etsiwa mitatsitinanaitianiki». Hiki Tsanitsuni katsariyanata mekaniwayehana, waikawa mekaninanaimakaitini.

Kepauka tuki mutuikatika 'aurie memitake,

26 Tsanitsuni temaiki mihaximekai mipai katiniutahiawe: «Kenenanuhani tuki mutuikatika mati'utsie mana nemirawiyani».

27 'Ana mekanihinekaitini 'ukitsi meta 'ukarawetsixi tukita, yunaiti piritsiteutsixi wa'ukiyarima muwa mekanayetekaitini, 'amautitewatsie mekanayetekaitini haika miriyari 'ukitsi 'ukari temawierika mewewieti Tsanitsuni 'aurie.

28 Hiki Tsanitsuni Yawé kaniu-tahiawe karima: «Kenenaye'eri Kakaiyari, waikawa nepimatsiwawirie, tawarita

'aixia keneneyurieka, xeimieme xeikia, tawarita xeimieme xeikia keneneupitia nemitiwakuhiwirieniki piritsiteutsixi nehixite memayetikixiki».

²⁹ Hiki Tsanitsuni tuki mutuikatika hutame kaniuiwixiani mana katinawiyakaitini, yutserieki xeime yu'utakita xeime.

³⁰ Hiki mipai katiniuhiwa: «Neke'umini piritsiteutsixi wahamatia». 'Ana kaneitaimaxiani naime kemitiitirikaiye, tuki kananuka'une piritsiteutsixi wa'ukiyarima waheima meta yunaime wahetsie muwa memayetekai. Yuwaikawame matsi 'ana kaniwarukwini Tsanitsuni miximet, keyuri meripaiti miwarukwikai 'uyeikati.

³¹ 'Iwamama meta maremama mekanekine meheikweiyuka. Meheikweka mekanekateuku Tsura meta 'Etsitahuri reuhixiapatsie, paapaya Manuhani manukateitsie. Tsanitsuni 'ixaheritsixi katiniwaruta'aitiakaitini xeitewiyari wiyari.

17

Mikahiyaxi kakaiyariximama

¹ Muhiriyatsie 'Epirahini kwieyaritsie xewiti kaniuyeikakaitini, Mikahiyaxi titewati,

² miki yumaama mipai katiniutahiawe:

—Xeimiriyari heimana xeitsienituyari (1.100) pirata tuminiyari pemunawatsiyarie meta miki tuminiki 'axa'aneme pemiyetua niuki, ne miki pirata nepexeiya, ne nematsi'unawatsiri.

Maamaya mipai katinitahiawe:

—Yawé 'aixia kematsiyurieka, neniwe.

3 Kepauka Mikahiyaxi yumaama tumini mu'ititia xeimiriyari heimana xeitsienituyari pirata tuminiyari, maamaya mipai katinitahiawe:

—Yemeki waikawa patsiekame nepayeitiani nepirata Yawé hetsie, neniwe xeime kakaiyari mitawewieniki xixiyakame pirataki wet-sitiariekame. Hiki 'ayumieme nepimatsi'itiani.

4 Kepauka miki yumaama mu'ititia, mikita huta tsienituyari pirata tuminiyari nanaka'ini, xeime kaniu'itiani pirata tsuname, miki kimana kakaiyari xixiyakame kaniutawewieni pirataki meta kwaxiyariekame, miki Mikahiyaxi kiita kaneutakerieni.

5 Miki Mikahiyaxi yutuki kanexeiyakaitini. Miki mawari wewiwame kamixaya 'etsiminena heriememe kaniutawewieni meta hipame kakaiyarixi, xeime yuniwe patsiekame kanayeitiani mawari wewiwame mihikitiniki.

6 'Ana 'ixaheritsixi ti'aitame mepikahexeyakai, yuxexuiti kemitiwanake xeikia mekatenyuriekaitini.

7 Xewiti temaiki rewi tewiyari Wereni Kura kwieyaritsie kiekame, Kura xiyarimama watsata kaniuyeikakaitini,

8 Wereni kiekaritsie kaniyeyani 'ikuwauneti hekwareki hakewa mekaniki. Huyeta 'umieti Mikahiyaxi kie kaniye'ani hiritsie 'Epirahini kwieyaritsie.

9 Mikahiyaxi mipai katinita'iwawiya:

—Hakewa pepeyetia.

Miki mipai kaniutayini:

—Ne rewi tewiyari nekanihikitini, Wereni kiekame, Kura kwieyaritsie, 'uximayatsika nepukuwaune hawaiki nemekaniki.

¹⁰ Mikahiyaxi mipai katinitahiawe:

—Nekie keneukani, nepaapa kenehikitini nemawari wewiwame kenehikitini, ne nematsiki'ititwani tamamata pirata tuminiyari xeiwyaritsie meta 'akemari 'a'ikwai.

¹¹ Temaiki rewi tewiyari kaniyuwairiya kiena mukaniki, Mikahiyaxi yuniwe hepai katinimaikaitini.

¹² Hiki Mikahiyaxi, rewi tewiyari kaniutike-maritiani, mipai miki mawari wewiwameya kanayani, kiena 'ukaiti.

¹³ Mikahiyaxi mipai kaniutayini: «Hiki mipai nepitimate Yawé waikawa pinetsiparewieni, rewi tewiyari nemawari wewiwame nemayeitiaki».

18

Rani xiiyarimama Rahitsi kememitekuyaxixi

¹ Hiki 'iyatukaritsie 'ixaheritsixi ti'aitame mepikahexeyakai, Rani xiiyarimama kwie mekaniwautiwekaitini yuhetsiemieme hakewa memekuyaxeki, miki 'akuxi mepikayetuiriyariewekai yukwie, hipati kememiteyetuiriyarie 'Ixaheri niwemama.

² Rani xiiyarimama Tsura meta 'Etsitahuri metiteti, yu'auxiwime kwinimieme memiteheuyutakwiwawe mekaniwaranayexeiya kwie memixeyayuki 'awie. Mipai mekateniwarutahiawe: «Xekenehu, kwie xekenexeyayu».

Miki hiritšie mekaniye'axiani 'Epirahini kwieyaritsie, Mikahiyaxi kie mekaniye'axiani, mana mekanitiheteitini.

³ Kepauka mana memu'axia Mikahiyaxi kie, rewi tewiyari niukieya mekaniu'enieni mekaneitimani, 'ayumieme mipai mekatenita'iwawiya:

—¿Kemi'ane 'uwa pımatsi'atia? ¿Kepetiyuriene? ¿Tita petikuwaune 'uwa?

⁴ Temaiki katiniwarutaxatiani Mikahiyaxi kemitiparewi, mipai kaniutayini:

—Pinetsi'uta'ini nepımawari wewiwameya pineti'iwitsitia.

⁵ Miki mipai mekatenitahiawe:

—Tematsiwawirie Kakaiyari pemitahiaweki mipai temitehetimaniki xika 'aixia tete-hakunuaxiakuni.

⁶ Mawari wewiwame mipai katiniwarutahiawe:

—Xekenehu kayuwati xehexeiyati. Yawé kexemite'akunuaxiani pıtimate 'aixia pıtixehakunuitiani xehuyeta.

⁷ Memuyu'auxiwi mekanekine, Rahitsi mekaniye'axiani, mana mekaniuneniere teiteri mekaniwaruxeiya 'aixia meteheukutekame, kayuwati meta yu'iyariki, kememite'u'uwakai tsiruniyutsixi. Tixaiti pikatiwareuyehiakai naime mekateniukaxexeiyakaitini. 'Ateewa paiti mekatenitekaitini tsiruniyutsixi mematitekaitsie, hipame wahamatia mepikayuxewiriyakai.

⁸ Kepauka memakunuaxia Tsura meta 'Etsitahuri kiekariyaritsie, wa'iwama mipai mekateniwaruta'iwawiya:

—¿Ke'aku xetehakunuaxia?

⁹ Miki mipai mekaniutiyuani:

—Hikimitika, tekaniwaretakwikuni.
Kwie 'aixia 'anekame tekanexeiya. Xeme
mipai xeteheukuteni 'atsixekateyurieti.
Xepikayu'iyaritiaka xeimieme tepiteheyurieni.

¹⁰ Kepauka mana xemi'axiani, kiekari
xekanetaxeiyakuni 'aixia raku'anekame meta
kwie 'ahakuyeukame Kakaiyari mixeyetuirie.
Yemeki miki kwieyaritsie tixaiti pikareuyewetse.

¹¹ Hiki Tsura meta 'Etsitahuri mekaniyekine
'ataxewime tsienituyari Rani xiixarimama yutupi
me'u'iti meheuyukwiyuka.

¹² Mekanekine Kiriati-Yeharini mekanikuyaxe
Kura kwieyaritsie. 'Ayumieme hiki Kiriati-
Yeharini 'utatanatsie “Rani kiekatari
memaka'uxipi” katinakutewaka.

¹³ Manata memiyeki mekanekine muhiriyatsie
'Epirahini kwieyaritsie, Mikahiyaxi kie
mekaniye'axiani.

¹⁴ Hiki yu'auxiwiti kwie memekuxei Rahitsi
kwieyari, yu'iwama mipai mekateniwaru-
tahiawe:

—Mipai xetemate 'iki kii 'ena muku'uta mawari
wewiwame kamixaya 'etsiminena heriemieme
kanexeiyani meta hipame kakaiyarixi, xeime
xixiyakame pirataki wetsitariiekame. ¿Hiki xeme
kexehaitikani?

¹⁵ Miki 'ahurawa me'ukineka, Rewi tewiyari
kiita mekaneutahaxiani, Mikahiyaxi kiiya
mihikitikai, mekanitahiawe 'aixia 'anemeki.

¹⁶ 'Ataxewime tsienituyari Rani xiixarimama
kitenie mekaniti'ukaitini yutupi me'u'iti
memeuyukwiyu metetahiti kitenie.

17 Meyu'auxiwiŋi kwie memekuxeiyakai mekaneutahaxiani kakaiyari mixixiya pirataki miwetsitarie mekane wayekweni, meta mawari wewiwame kamixaya 'etsiminena meta hipame kakaiyarixi. Mexi kuyaxi 'ataxewime tsienituyari yutupi me'u'iti memeuyukwiyu kitenie mawari wewiwame hamatia meti'ukai.

18 Kepauka memeutahaxia Mikahiyaxi kiita memuyu'auxiwi, kakaiyari mixixiya pirataki miwetsitarie memiwayekwei meta mawari wewiwame kamixaya 'etsiminena meta hipame kakaiyarixi, mawari wewiwame mipai katiniwaruta'iwawiya:

—¿Kexeteyurie?

19 Miki mipai mekaniutiyuani:

—Kayuwati. 'Atsipepikahaineni. Kimi ketananuweiya, ta'ukiyari tamawari wewiwame pepayani. Matsi 'aixia piyini xeinuiwari 'Ixaheri hetsiemiemete wamawari wewiwame pemihikitini, keyuri xeime tiriya mama wahetsiemieme xeikia.

20 Mawari wewiwame kaniuyukatemawieni. Katinepini mawari wewiwame kamixaya 'etsiminena meta hipame kakaiyarixi meta mixixiya pirataki miwetsitarie, hiki wahamatia kaneyani.

21 Miki yuniwema yutewama yupiinite metewara'arieti mekanekine mewaranuhaitiyati.

22 'Ateewa paitiri me'uhukaku Mikahiyaxi kie meyekineka, Mikahiyaxi 'aurie memititekai mekaniuyukuxerieni Rani xiiyarimama mekaniwaranukuweiya.

²³ Wa'utia meheuhiwaxiaximekaku, Rani xiiyarimama yu'utia mekananakuneniene Mikahiyaxi mipai mekatenuuta'iwawiya:

—¿Kekuta titayari 'ateiterima petiwaraninie?

²⁴ Mikahiyaxi mipai kaniutayini:

—Xeme nekakaixarixi xepiwarenawa, ne nemiwarutiwewi, meta nemawari wewiwame xepewiti miya xeteheyurieka xepeweki. Tixaiti xepikanete'uhayewi. 'Akuxi xeneteha'iwawiya panatsi xekatemate.

²⁵ Rani xiiyarimama mipai mekaniutiyuani:

—Kwinimieme pepikatatiuhihiwani, tietitsi hipati meminiuyeha'a ta'iwama memixeniutakwi, 'eki meta 'atixiriyama meminiwarukwi.

²⁶ Mipai me'utiyuaka Rani xiiyarimama mekanekine. Mikahiyaxi waxeyati kwinimieme memitetirikawikaiki mana kaniyenuani yukie kaneyani.

²⁷ Mipai mekatenuuyupinitiani Rani xiiyarimama Mikahiyaxi mitiutiwewiekai meta mawari wewiwameya, mekanekine Rahitsi, kiekari kayuwati hexeyakame mekayukweriwayurieti, mana kiekatari 'ixiparaki mekaniwarukwini, wakiekari mekaniutataiya.

²⁸ Nixewiti pikawaruparewi, Tsiiruni 'ateewa paiti piti'aneikai, miki xeime hamatia mepikayuxewiriyakai. Miki kiekari hayewerikaku piyemakai, Weti-Xekuwi kiekariyaritsie mepite'awiyakai.

'Arike miki Rani xiiyarimama kiekari 'aixia mekaniukuyurieni mana mekanitiyaxe.

²⁹ Rani meteniteriwa yututsi mema'eriwaniki kemititewakai, 'Ixaheri nu'aya mihikitikai, tsepa meripaiti miki kiekari Rahitsi mititewakai.

³⁰ Mana mekanitakeni kakaiyari mixixiya pirataki miwetsitiarie memeyexeiyani, miki Kunatani, Keritsuni nu'aya Muitsexi teukarieya meta niwemama mawari wewiwamete mekanakine Rani xiiyarimama wahetsiemieme kepaukake memehapanie.

³¹ Rani xiiyarimama Mikahiyaxi kakaiyarieya mixixiya pirataki miwetsitiarie mekanayex-eiyakaitini yuheyemeki, Kakaiyari tukieya Tsiiru mirakutewatsie 'uwekakutiti.

19

Xewiti rewi tewiyari hutarieka yu'iya matia

¹ Kepauka 'ixaheritsixi ti'aitame memikahexeyakaisie, xewiti rewi tewiyari hiritsie 'Epirahini kwieyaritsie kiekame, xeime kaniutiwitini 'ukaratsi hutarieka 'iyaya mayaniki Wereni kiekame Kura kwieyaritsie.

² Peru miki 'uka kaniku'eirieni, kaninuani yupaapa kie Wereni Kura kwieyaritsie. Mana nauka metseri kaniyuriekaitini.

³ Hiki 'uki yu'iya hetsia kaneyani wit-sireitixatiame mewitiniki, xeime kanewitini ti'uximayatame meta yuhutame puxuri kaniware'arieni. 'Ukaratsi yupaapa kiita kaneita'inieni, paapaya 'ixeyaka waikawa kaniyukatemawieni.

⁴ Munieya wairiyarika 'ipitiati kanikunuitiani, miki kaniukunuani haika tukari, metekwati, me'ietiweti, muwa me'ayehipiteti.

5 Naurieka tukaritsie ximeri paiti mekananuku'uni me'ayekineke, peru 'uka paapaya yumune mipai katiniutahiawe: «Ketineukwa'i pemitatirikaxianiki, 'anake pekaniyemieni».

6 Hiki mekananukayaxe miki yuhutati memitekwaniki memite'anu'ieniki. 'Arike 'ukaratsi paapaya mipai katinitahiawe: «Neuxei, keneukunua 'iki tikariki temuyutemamaw-iekaki».

7 Kepauka Rewi tewiyari manukuke miyemieki, munieya kanikunuitiani wai'riyarika 'ipititi, mikita kaniukunuani miki tikaritsie.

8 'Auxiwirieka tukaritsie ximeri kananukukeni, peru 'ukaratsi paapaya mipai katinitahiawe: «Pepitatirikaxiani 'akuxi. Keneukunua taikaike pepiyemie». Hiki yuhutati mekatenukwani.

9 Kepauka 'uki manukuke miyemieki yu'ia hutarieka mieme hawititi meta tiyu'uximayatsiriwame, 'ukaratsi paapaya, mipai katinitahiawe: «Neuxei, pikiyirime, putaikairi. 'Ena keneukani, keneukunua tikariki temuyutitemawieniki. 'Uxa'a ximerike 'akie pekaniyemieni».

10 Tawarita kanuamiti xeitikari, miki kanayeyani Kewutsi hepatsie kaneyani, 'arike Kerutsareme mitiuteriwarie, puxuri yuhutame me'u'ikame warahapati meta hutarieka mieme yu'ia 'awititi.

11 Kepauka Kewutsi meuhurakai, kuyiririmekakuri, ti'uximayatame miti'aitia mipai katiniutahiawe:

—Hikimi 'ena tepaukayune kewutseutsixi wakiekaritsie mana tepetiheni.

¹² Peru miti'aitia mipai kaniutayini:

—Hawaiki. Mana tepikaheukayune 'ateewa paiti kiekatari mepihiki, mepika 'ixaheritsixi. Tepuhuni Kiweya kiekariyaritsie paiti temeta'axianiki.

¹³ Mipaitatsiere kaniutayini:

—Hikimi, Kiweya tekaniye'axiakuni yatsepa Xama kiekariyaritsie, mana tepekuheni tsepa kemi'ane kiekariyaritsie.

¹⁴ 'Ayumieme mana mepikakuhetei. Hiki tau 'akayuneku Kiweya hixie mekaniuyehukaitini, Wenikamini kiekariyaritsie.

¹⁵ Hiki mana mekaniye'axiani mana memitiheniki Kiweya. 'Uki kaneyani teiteri memayukuxexeiriwatsie, mana nixewiti pika'ita'ini kiena mukaniki tikariki.

¹⁶ Miki taikaiyaritsie xewiti 'ukiratsi nakunuakaitini yuwaxata reku'uximayataka, hiritisie kiekame 'Epirahini kwieyaritsie, Kiweya kaniukateitini 'ateewa kiekame hepai. Mana kiekatari Wenikamini xiiyarimama mekanihikitikaitini.

¹⁷ Kepauka 'ukiratsi 'ateewa yeikame muxei teiteri memaye'axetsie, mipai katinitahiawe:

—¿Hakewa pepeutia? ¿Hakewa pepeyetia?

¹⁸ Yeikame mipai katinitahiawe:

—Yatetehuti tepiyia. Wereni tepeyeki Kura kwieyaritsie, hiritisie 'ateewa tepeuki, 'Epirahini kwieyaritsie nekie. Wereni nepekatei yapaimexia tukari, hikita nepetia Yawé tukieya manuwe, peru nixewiti pikanetsi'inie kiena nemekaniki.

19 Tapuxurima wami¹axa tepexeiya, paa winu nehetsiemieme meta ne'iya, temaikitsiere nehamatia mumie. Tixa²iti pikatareyehiwa.

20 'Ukiratsi m³ipai katinitahiawe:

—Nekie 'aixia pepirekani, tsepa tita pemireuyehiaka ne nepimarekupinirieni. Peru 'ena pepikayukuhayeikawani tikariki.

21 Hiki kaneiwitini yukie puxurimama katiniwaretimini, yu'ikate me'utihauxika mekatenukwani mekatenu'ieni.

22 Mexi yu'iyariki metekwakai, hipati teiteri miki kiekaritsie kiekatari kiwarie mekana'utikine. 'Ituparitsie meteheuhutsunati, m⁴ipai 'ukiratsi mete'uhiwiwati kii kutsiyari.

—'Uki kenewayewitiki 'akie munua. Hamatiana tepikahini.

23 Kii kutsiyari kanewayeyani m⁵ipai katiniwarutahiawe:

—Hawaiki ne'iwama, 'axaxepikate'u'iyarini, 'iki tewi pine'iwatame. Miki xepika'itewiyatsitiaka 'axamiti'aneki.

24 Neuxei, neniwe 'ena puka kamayiyati, meta 'iki tewi hutarieka 'iyaya. Nekaniwaranuyeni'amiki, kexemiwayurieka miki. Peru 'iki 'uki xepikatewiyatsitiaka 'axamiti'aneki.

25 'Axateyuruwamete 'ukiratsi mepika'u'eni, hiki Rewi tewiyari yu'iya kananuyeni'ani. 'Ana 'ukitsi hamatiana mekaniukahini wairiyarika me'ipitiatu mete'ikwinitiatu tikariki kepaukake kahekiaririmekaku, mekanitatuani.

26 Nikahekiaririmekaitini kepauka 'ukaratsi munua, kitenie kaniukaweni hakewa kinaya

mayekatei. Mana kaniuyuhayewa kepaukake mukahekiarixi.

²⁷ Kepauka kinaya ximeri manukuke kitenie mireuyepi yemieka, yu'ia kaniuxeiya takwa 'ukaikame kitenie heutameti.

²⁸ Mipai katinitahiawe: «Kenanukukeka, kimiri», peru miki pika'i'ta'ei. Hiki miki yupuxutsie henuti'ikataka yukie kaneyani.

²⁹ Kepauka munua yukie, nawaxaki kanitixi-texiani yu'ia tamamata heimana huta paimeme kanayeitiani, hiki miki naitсарie kwie muku-manetsie 'Ixaheri kwieyaritsie kanitani'axiani.

³⁰ Yunaiti me'ixeyaka mipai meka-niutiyuanekaitini: «Hawaiki mipai tepikatehenenieriwawe, kepauka paititi 'ixaheritsixi 'Ekipitu memeyeki. Kexeteku'eriwa 'ikiki, xekeneutimaixiaka yaxeketateneutahiawi ketemiteyurieni».

20

'Ixaheritsixi, Wenikamini xi'yarimama mekani-warutakwini

¹ Yunaiti 'ixaheritsixi Rani meye'atikaiti 'at-sita Weritsewa Karaha kwieyaritsie meye'atikaiti, meyutaxewireka Mitsipa mekaniuyukuxeriени Yawé hixie.

² Memanuyetei te'aitamete yunaime wahetsiemieme, meta 'ixaheritsixi wanui-warite memitewa'aitia, mekananukayaxe Kaka'iyari teiterimama memayuxerietsie. Mekanihikitikaitini nauka tsienituyari miriyari (400.000) kuyaxi yu'ixipara me'u'iti.

3 'Ana mekatenetimani Wenikamini xiiyarimama kename 'ixaheritsixi Mitsipa me'anutikinekai. Hiki 'ixaheritsixi Rewi tewiyari mipai mekateniuta'iwawiya:

—Ketatineutaxatia ke'axapemiranuyetia.

4 Rewi tewiyari, mipai kaniutayini 'ukaratsi mumerie kinaya:

—Ne'iya hamatia Kiweya tepiyaxia Wenikamini kwieyaritsie mana temitiheniki.

5 Tikariki teiteri Kiweya kiekatari kiwarie mepaketiki, menetsimienike. 'Ana ne'iya hamatia mekanekahini waiiyarika meheipitiaka 'atsita kepaukake memi.

6 Hiki neheitikweka, nekaneitixitexiani kememiyupaime 'Ixaheri nuiwarimama wahetsia nekaneitani'axiani, miki 'axati'ane kame memiteheutiwiwiexiaki 'Ixaheri kwieyaritsie.

7 Xeme hiki yunaiti 'ixaheritsixi, xekeneuti-maixia, yaxekeneutiyua ketemiteyurieni hiki kwitiwa.

8 Yunaiti teiteri mekaniuyunini mekananuku'uni yaxeikia meteku'eriwati, mipai mekaniutiyuani:

—Nixewiti yuxamaruta pika'axeni meta yuki-ita.

9 Mipai tekateniyurikuni Kiweya kiekatari wahapai'sita: 'Iniariki tepuyuta'iwa kemi'ane memitamieni.

10 Yunaime nuiwaritetsie xeitsienituyaritsie tamamata teiteri tekaniwaranuyehapakuni, xeimiriyaritsie xeitsienituyari teiteri, tamamata miriyaritsieta xeimiriyadi, 'ikwai memitekuwauniki kuyaxi wahetsiemieme.

Kepauka kuyaxi Kiweya Wenikamini kwieyaritsie memiye'axiani yameniwayurikuni 'axamemite'uyuriki 'Ixaheri kwieyaritsie.

¹¹ Hiki yunaiti 'ixaheritsixi me'uyutinika me'utaxewireka, miki kiekari memitamieniki.

¹² Yunaiti 'ixaheri nuiwarimama texaxatamete mekaniwareni'ani Wenikamini xiiyarimama wahetsia, mipai metewarahiaweti: «¿Kexeteku'eriwa ke'axamitiuyi xehetsia?

¹³ Xekeniwayetua 'axamemite'uyuri miki Kiweya kiekatari, temiwakwiniki mipai 'axamiti'ane temite'akumaweriyaki 'Ixaheri kwieyaritsie».

Peru Wenikamini xiiyarimama mepikawaru'eni yu'iwama 'ixaheritsixi.

¹⁴ 'Apita, yunaiti miki kwieyaritsie kiekatari mekaniuyukuxeri eni Kiweya kiekariyaritsie memiwatakwiniki 'ixaheritsixi.

¹⁵ Miki tukaritsie Wenikamini kwieyaritsie kiekatari mekaniwarukuyuitiani yunaime yukiekaritetsie xetewiyari heimana 'ataxewi miriyari (26.000) kuyaxi yu'ixipara me'u'iti, 'akuxi 'atahuta tsienituyari teiteri memanuyexatsie Kiweya kiekatari.

¹⁶ Yunaime watsata mekaniu'uwakaitini 'atahuta tsienituyari kuyaxi memi'utatika memanuyexatsie, yunaiti miki yu'utama texupameki memiteheutatuaxiwawe meta kwiniemieme meteheu'iniairitiati.

¹⁷ 'Ixaheri, Wenikamini meka'iniaitati, kaniwarukuha'aritiani nauka tsienituyari miriyari (400.000) kuyaxi yu'ixipara me'u'ikame, yunaiti miki kwiniemieme memiteheuyutakwiwawe.

18 'Ixaheritsixi Weteri mekaniye'axiani
Kakaiyari mekaniutahiawe. Mipai
mekatenita'iwawiya:

—ǂKemi'anemeri piyini Wenikamini
nuiwarieya mitamieni?

Yawé mipai kaniutayini:

—Kura nuiwarieya meri mepiyiaka.

19 'Ixaheritsixi ximeri paiti mekananuku'uni Ki-
weya hixie mekaniuyuhayewa,

20 Wenikamini xiiyarimama mekaniwarutak-
wini, Kiweya hixie 'aixia mekateniuyu'uituani ke-
hepai memitewakwinikekai.

21 Peru Wenikamini nuiwarimama Kiweya
mekanayekineta 'ixaheritsixi mekaniwarutak-
wini, mekaniwarukwini xeitewiyari heimana
huta miriyari (22.000) mewakwitiweti.

22 'Ixaheritsixi mekaniuyukuwairiya
hutariekata memiwakwiyuki hakewa matiari
memiwaretakwi,

23 Yawé hixie 'ixaheritsixi mekaniutitsuakaitini
me'anutikineka taikai paiti meta tikariki,
mekanita'iwawiyakaitini:

—ǂTawarita tetewatakwini Wenikamini
xiiyarimama, ta'iwama?

Yawé mipai katiniwarutahiawekaitini:

—Xekenehu.

24 Mipai hutarieka tukari 'ixaheritsixi
mekanaye'axiani Wenikamini xiiyarimama
wahetsia.

25 Wenikamini kwieyaritsie kiekatari
mekanayekine Kiweya mewatakwinike, tawarita
mekaniwara'iwa tamamata heimana 'atahaika

miriyari (18.000) 'ixaheritsixi, yunaiti miki
yu'ixipara me'u'ikame.

²⁶ Hiki yunaiti 'ixaheritsixi, mekananutikine
Weteri, mana mekanitiyaxe mekaniutitsuani
Yawé hixie. Miki tukaritsie mekaniyuhakieni
kepaukake mukuyirixi, 'ana Yawé mawari taiyari-
yari mekaniuwewirieni meta memiyuxewiniki
mawariyari.

²⁷ 'Ariketa Yawé mekaniutahiawe, 'ana miki
tukaritsie mana kaniukateitini kakuni tiratuyari
Kakaiyari hetsiemieme.

²⁸ Pinexi, 'Eriyatsaxi nu'aya 'Aruni teukarieya,
hixiena katini'uximayakaitini. Mipai mekateni-
uta'iwauni:

—¿Tawarita tetehu tetewatakwini ta'iwama
Wenikamini nuiwarimama, nutsu tepuwa-
hayewa?

Yawé mipai kaniutayini:

—Xekenehu, 'uxa'a nekanixeyetuiriemiki.

²⁹ 'Ixaheritsixi mekaniwaruhupieni Kiweya
warita.

³⁰ Hairieka tukaritsie 'ixaheritsixi mekani-
warutakwini Wenikamini nuiwarimama
'aixia mekatenuyu'uitiani Kiweya kiekariyari
memitamieniki, meripai hepai.

³¹ Wenikamini nuiwarimama mekanayekine
wahetsia, mekaniuyuitarieni yukiekari
memuku'eirieniki. Hiki mekaniutayuan
'ixaheritsixi mewara'iwati, meripai hepai,
mekaniwarukwini xetewiyari heimana
tamamata mitahekiatsie, Weteri huyeyari 'utia,
meta Kiweya huyeyari 'utia.

32 Wenikamini nuiwarimama mipai mekaniutiyanekaitini: «Tepiwaraiwarime meripai hepai», peru 'ixaheritsixi mipai mekaniutiyanekaitini: «Tepitata'una huyeta paiti yukiekari memiku'eirieniki».

33 Yapauka, 'ixaheritsixi mekaniuyupata, mekaniuyutakwini Wahari-Tamaxi kiekariyaritsie, 'ixaheritsixi memiyu'awietakai mekaniwatikine Kiweya tau makayuyupiketsie hepaitsita mekaniuyutakwini.

34 Tamamata miriyari (10.000) kuyaxi 'ixaheritsixi waikawa memeuyutakwiwawe Kiweya mekaniye'axiani mana 'imieri waikawa mayetse'ikaiki, Wenikamini nuiwarimama 'atsimepikatemalaikai kename meha'iwarienikekai.

35 Yawé Wenikamini nuiwarimama kaniwaruka'una 'ixaheritsixi wahixie, miki tukaritsie 'ixaheritsixi mekaniwarukwini xeitewiyari heimana 'auxiwime miriyari heimana xeitsienituyari (25.100) Wenikamini xiiyarimama, yunaiti miki yu'ixipara me'u'ikame.

36 Mana Wenikamini nuiwarimama mipai mekatenetimani kename meha'iwariekai.

'Ixaheritsixi mekaniuyuta'una Wenikamini nuiwarimama wahixie, memiyu'awietakai Kiweya kiekariyari 'aurie wahetsie meheuwairiti.

37 Yapauka memiyu'awietakai Kiweya kiekariyaritsie mekanitahaxiani, kememiyupaime mana mekaniu'axiani, yunaime mekaniwarukwini miki kiekaritsie kiekatari.

38 'Ixaheritsixi mipai mekateniuxatakaitini kename kepauka kitsi memexeiya kiekari heima,

³⁹ 'ixaheritsixi tawarita meyutakwinikekai.

Kepauka Wenikamini nuiwarimama 'ixaheritsixi memiwarukwikai, xeitewiyari heimana tamamata mewarukwika, mipai mekaniutiyuanekaitini: «Tepiwaraiwarime matiari hepai».

⁴⁰ Peru kepauka kitsi kwiniepati matike kiekari makuma, Wenikamini nuiwarimama ta'aurie mekanaxirieni mekanixeiya kiekari kitsiyari muyuawitsie heutiyuneme.

⁴¹ 'Ana 'ixaheritsixi mekaniwarutakwini, Wenikamini nuiwarimama mekaniutimamani mipai mete'u'erieka kename meha'iwarie.

⁴² Hiki 'ixaheritsixi mewamakati mekani-uyuta'una huye makumawetsie mieme 'utia, peru mepika'uyiwekaxia memiyuti'awietakekai mana mepiwarutakwi.

⁴³ Wenikamini nuiwarimama wawarita mekanaketikine, mekaniwaranukuweiya mekaniwakwitiwekaitini Kiweya, tau manatineika hepaitatsie.

⁴⁴ Tamamata heimana 'atahaika miriyari (18.000) mekaniukwini Wenikamini nuiwarimama, yunaiti miki kwinimieme meteheuyutakwiwaweti.

⁴⁵ Kepauka memeki 'ai Ximuni hetia, 'ixaheritsixi mekaniwarukwini 'auxiwime miriyari huyeta. Mekaniwaranukuweiya Kiruni kiekariyaritsie paiti, mekaniwarukwini tawarita huta miriyari.

⁴⁶ Miki tukaritsie mekaniukwi'iwa Wenikamini nuiwarimama xeitewiyari heimana 'auxiwime miriyari (25.000) yu'ixipara me'u'iti, kwinie memiteheuyutakwiwawekai.

47 Mekaniuyuta'una 'ataxewime tsienituyari makumawetsie 'atsita 'ai Ximuni hetia, muwa mekanayetekaitini nauka metseri.

48 'Ixaheritsixi tawarita mekaniwarutakwini, Wenikamini nuiwarimama mekaniwarukwini 'ixiparaki naime kiekaritetsie meta tewaxi naime mekateniuka'una tita memite'ukaxei. Meta kiekarite naime mekaniutitaiya.

21

Wenikamini nuiwarimama wa'itama

1 Mitsipa 'ixaheritsixi mipai mekaniutiyuakaitini: «Nixewiti yuniwe Wenikamini xiiyarieya pikakuwitiwani».

2 Yunaiti mekanekine Weteri, mana mekaniukutaikairiyarieni, meyunenewieti me'utitsuati waikawameki Yawé hixie.

3 Mipai mekateniwawiriekaitini: «Neuxei Yawé, 'Ixaheri Kakaixarieya, titayari yaranuyemie 'Ixaheri. Hiki xeinuiwari kaneukuyani».

4 'Uxa'arieka ximeri mehanuku'uka, tenutsari mawari wewiwame mekaniutawewieni, mana mawari taiyariyari mekaniuwewieni meta memuyuxewiniki mawariyari.

5 Hiki mipai mekateniuyuta'iwawiya 'ixaheritsixi: «ǂKemi'ane hiki xewiti nuiwari pikahekuyeixia Yawé hetsia miemete memayutix-exeiriwa Mitsipa?» Mipai mepiteyihiritiakai Yawé hixie kemi'ane mikaheuyani: «Kanimieriemiki».

6 'Ixaheritsixi mekaniuyukahiwerieni yu'iwama Wenikamini nuiwarimama waheki. Miki mipai mekaniutiyuani: «Hiki xewiti tahetsia mieme nuiwari kanewatihunarieni.

7 ¿Ketetewaneikitiani memuyuhayewatiwe tameri Yawé mipai temite'utahiawixi kename taniwema tekawawititiani?»

8 Hiki mekaniuta'iwauni: «¿Kemi'ane 'Ixaheri nuiwarieyatiti Yawé hixie Mitsipa mepika'u'axia?» Mipai mekatenetimani nixewiti mikahayewekaiki Kawetsi-Karaha kiekame memayuxeirietsie,

9 kepauka memanuyenierixi mekatenetimani kename Kawetsi-Karaha kiekame nixewiti kahayewekai.

10 Hiki memuyuxeirie mekaniwareni'ani tamamata heimana huta miriyari (12.000) kuyaxi mipai metewarutahiaweka: «Xekenehu 'ixiparaki xekenewarekuya Kawetsi-Karaha kiekatari. Wa'itama meta tiiri xekeniwarekuya.

11 Mipai xekateneyurikuni: Yunaime 'ukitsi xekanewarekwikuni meta 'ukarawetsixi memiwikie».

12 Hiki Kawetsi-Karaha kiekariyaritsie mekaniwarutaxeiya 'ukari 'imarixi nauka tsienituyari, mekaniwarewitini kuyaxi wahetsia Tsiru memetitekai Kanani kwieyaritsie.

13 Hiki yunaiti 'ixaheritsixi niuki mekaniwareni'airieni Wenikamini nuiwarimama 'ai Ximuni hetia memayetekai, 'ari memiteheuyuyehiwiriekaki.

14 'Ana mekaniu'axiani Wenikamini nuiwarimama, 'ixaheritsixi 'ukari mekaniwarutawititiani Kawetsi-Karaha kiekatari. Peru yunaiti mepikate'unakixi.

15 'Ixaheritsixi 'akuxi mekaninututuixiekaitini Wenikamini hepaitsita, Yawé mikumaweriyaxiki 'Ixaheri nuiwarieyatsie.

16 'Ukirawetsixi memiyuxeirie mipai mekaniutiuyuani: «¿Ketetewaneikitiani 'ukitsi memuyuhayewaxi, 'ukari Wenikamini nuiwarimama memeuyeweki?»

17 Mipai mekateniuihiwakaitini: «Memutawikwei Wenikamini nuiwarimama mepitiniuarienikuyu, xewiti 'Ixaheri nuiwarieya mikaheuyewautseniki.

18 Peru tame tepikayiwawe temiwaruwititiani taniwema, mipai temiteyihiritiaki: “Axake'itiarieka kemi'ane yuniwe xeime Wenikamini nuiwarieya miwititiani”.

19 Peru neuxei, Yawé 'ixiararieya paye'axime mutiwewiwa Tsiwu Weteri heima, Weteri huyeyari 'utia Tsikeni meutayune meta Rewuna hetia».

20 Hiki mipai mekateniwarutahiawe Wenikamini nuiwarimama: «Xekenehu, xekeneyuti'awieta kaxie haraweriyari makumanetsie

21 kayuwati xeketeneteni. Kepauka 'iimarixi Tsiwu kiekatari meme'axiani metekuneitiweti, kaxie makumanetsie xekeneawayekini yuxexuime xekenewarenawa 'ukari xe'iitama memakineki, 'anari xekenehu Wenikamini kwieyaritsie.

22 Xika wapaapama wa'iwama metatsihatieyuni, mipai tepitewatahiawe: “Yiki xepikatewarahiaweni, wa'iitama memakineki tepikawarukaxei temitakwitiwekaitsie. Yatini xeme xehetsie pikarahiawani, xeme xepikawaruwititia yuniwema”».

23 Mipai mekateniuyurieni Wenikamini nuiwarimama. Kepauka 'ukari memiteneitiwekaitsie, yuxexuti yuxexuime

mekaniwarutanawani mekaniwarewitini. Mekaniu'axiani yukwietsie, kiekari mekaniukamani mana mekaniuyuhayewa.

²⁴ Mipai tiuyikuke 'ixaheritsixi mekaneutayeixiani mematitekaitsie yunuiwarima meta yuxiiyarima wahetsia yukwieyaritsie mekaniu'axiani.

²⁵ Miki tukaritsie ti'aitame 'Ixaheri kwieyaritsie pumawekai, yuxexuiti kemitiwanake xeikia mepiteyuriekai.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3